

Xajon ra tsikínda ítjòn jè Pablo ra isìkasén-la xítà naxindá-la Cristo ra títsajna ya Corinto

Kó'sín nga síhixo'ta Pablo xítà Corinto

1 ¹Koaá 'sín tísikásén-no xajon rakii, 'an ra 'mì-na Pablo ra xá ko'sín inakjoá-na nga 'an tsikíxáya-na Jesucristo, nga 'koaá 'sín kjomejèn-la Nainá. Inchinìhixo'tá-lajin ko jè 'ndsé Sóstenes, ²jiòn ra tí'koa naxindá-la Cristo ma jiòn, ra ya titsajna ya naxindá Corinto. Jiòn, a'ta 'tse Cristo kisitsje-no Nainá, ko xá jè ko'sín tsjahíjin-no mé-ni nga xítà tsje-la koma jiòn, koni 'sín isìko nga'tsì xítà ra jeya síkíjna Jesucristo ra tíjna ítjòn-ná, nì'sín ta nándà-ni nga tíjma. Jè Cristo tíjna ítjòn-la jñà xítà kii, ko jé-te ra tíjna ítjòn-ná ra jién. ³Nainá ra Na'ín-ná ma ko jè Jesucristo ra tíjna ítjòn-ná katatsjá-no kjonda ko kjo'nchán ya ajin inìma-no.

Kó'sín nga tsjá-la kjonda Nainá jè Pablo

⁴Kji'tá nìchjin tsja-la kjonda Nainá ra a'ta tsajìon-jiòn, ta ngatjì-la jè kjonda ra kitsjà-no Nainá a'ta 'tse Jesucristo nga nda isìchikon'tin-no. ⁵Nga yaá a'ta 'tse Cristo nga tse kjonda isakò-la inìma-najiòn, koni 'sín nga nakjoá jiòn 'én-la Nainá ko koni 'sín machiya-no kó'sín nga tsò-ni, ⁶koni 'sín nga Nainá isikixiyajin ya inìma-no jè 'én nda-la Cristo ra ki'senajmí-no. ⁷Koaá ma-ni 'ndi, mì tsa tí mé kjo'tjò-la Nainá chija'ta-najiòn nga ma siitjasòn xá-la, 'kia nga ko'sín inchichiñá-la nga kj'íí india-ni jè Jesucristo ra tíjna ítjòn-ná. ⁸Jé Nainá tsjá-no nga'nó skanda 'kia nga kjehe'tà nìchjin, mé-ni nga nijngo jé sakò-ni a'ta tsajìon 'kia nga kitjojen india-ni jè Jesucristo

ra tǐjna ítjòn-ná. ⁹Nainá, ngi xitǎ kixǐ-ní, síhitjasón-ní koni 'sín nga tsǎ 'én-lǎ. Xá jè ko'sín kiichǎ-najiòn nga ya kitsajnakjo-koo jìòn jè Jesucristo ra l'ndí-lǎ ma, jè ra tǐjna ítjòn-ná.

Kó'sín nga kjòjòyáá naxǐndá-lǎ Cristo ya Corinto

¹⁰Ndí 'ndsé ko ndí tichjeé, 'koaá 'sín tíbitsá'ba-no ra a'ta 'tse Jesucristo ra tǐjna ítjòn-ná, nga jngoó kjobítsjen tichjeén nga'tsi-no; kǐ tà chǎn nijòya kjobítsjen-no; ta isaá 'ñó nda tǐtsajtín jnchro nga jngoó kjobítsjen kata'se-no, ko ngàsòn 'tè-la takòn. ¹¹Jìòn ndí 'ndsé, kií ko'sín tíxin-no, nga 'koaá 'sín tsi'kénajmí-na ra a'ta tsajìòn-jìòn jǎà xitǎ-lǎ Cloé, nga kjoachiti-ró tǐjn-najiòn. ¹²Kií ko'sín tíxin-no, nga jngó jngó-najiòn, tǐjn ra tsò: “'An, jé Pablo fi'ta-lǎ.” Ko tǐjn ra tsò: “Jé Apolos fi'ta-lǎ ra 'an.” Tǐjn ra tsò-te: “'An, jé Cefas tífi'tà-lǎ.” Ko tǐjn ra tsò: “Jé Cristo fi'ta-lǎ ra 'an.” ¹³¿A 'koaá ma-najiòn nga kjìn-ya ma-ni Cristo? ¿A jé Pablo ra isa'ta ngajo-no krò? Ko, ¿a a'ta 'tse 'í-lǎá Pablo nga isatíndá-najiòn? ¹⁴Tsjaá-lǎ kjònda Nainá, nga mì tsa yá xitǎ tsajìòn ra tsatíndáa ra 'an, ta jé-ní Crispo ko Gayo, ¹⁵mé-ni nga nijngo-najiòn ra kixó: “A'ta 'tseé Pablo isatíndá-na ra 'an.” ¹⁶Tíbitsjen-te-na nga tǐ'koaá 'aán ítsatíndá-te Estéfanos, ko jǎà xitǎ xákjién, tanga mì kǐ tǐ bítsjen-naa tsa tǐjn-isa xitǎ ra 'an ítsatíndáa. ¹⁷Nga mì tsa ko'sín tsikí'tin-na Cristo nga xitǎ kotíndáa, jé-ní ra tsikí'tin-na nga jè kichǎ 'én xitse-lǎ ra nda tsò. Ko mì tsa jǎà 'én ra 'ñó chjǐne ísichjeén ra tǐjn-lǎ xitǎ isà'nde mé-ni nga mì kǐ tǎhixìn-lǎ jè nga'ñó ra tǐjn-lǎ 'kia nga 'ken Jesús ya a'ta krò.

Yá-ni Cristo ra a'ta 'tse Nainá

¹⁸Jǎà 'én ra 'senajmíya ra a'ta 'tse Cristo nga 'ken'ta krò, ta kjoaská ma-lǎ jǎà xitǎ ra tǐjmaya ndiyá kjobiya. Tanga jién ra ìnchibítjokajieén kjohi'in, 'koaá 'sín makjín-ná nga nga'ñó-lǎ Nainá-ní. ¹⁹'Koaá 'sín tíchǎ 'én ra tǐ'ta Xajon-lǎ Nainá nga tsò:

Jǎà ra 'ñó tǐjn-lǎ kjoachjǐne, 'aán ko'sín sikoo nga katachija kjoachjǐne-lǎ.

Ko kochrjéngi-náa kjobítsjen-lǎ jǎà ra 'ñó nda machiya-lǎ.

²⁰Jñà x̄it̄a ra 'n̄ó chjine tsò-l̄a ijo-l̄a, jñà ra chjine xajon, k̄o jñà ra ma-l̄a joóya-ni kjoa ra 'tse isà'nde rak̄i, ç̄n̄anda kijí kjoachjine-l̄a 'ndi-ni? Jé Nainá k̄o'sín isik̄o nga kjóskáya-l̄a jñà kjoachjine-l̄a x̄it̄a isà'nde. ²¹Nainá 'n̄ó chjine ra jè; m̄i k̄i kitsjá'nde-l̄a x̄it̄a nga a'ta 'tse kjoachjine-l̄a x̄it̄a isà'nde kijtsexkon-ni ra jè. Tanga 'koaá 'sín sasén-l̄a nga bachrjekàjin kjohi'in jñà x̄it̄a ra makjiín-l̄a a'ta 'tse 'én nda-l̄a Cristo, jè 'én ra ta kjoská ma-l̄a jñà x̄it̄a isà'nde.

²²Jñà x̄it̄a judío, kjoxkón síjé nga ma kokjiín-l̄a; k̄o jñà ra m̄i tsa x̄it̄a judío, tà jé ra mejèn-l̄a nga kji'nchré 'én ra kjoachjine tjik̄o. ²³Tanga ra jin, jé 'benajmíya-jin nga krò 'ken'ta jè Cristo ra xá inikasén-ni. Tanga jñà x̄it̄a judío, ta kjoa'choó ma-l̄a a'ta 'tse jñà 'én k̄i, k̄o ta kjoská ma-l̄a jñà ra m̄i tsa x̄it̄a judío. ²⁴Tanga jñà x̄it̄a ra xá Nainá tsjahíjin-ni, ra x̄it̄a judío, k̄o jñà ra m̄i tsa x̄it̄a judío, 'koaá 'sín makjiín-l̄a nga jè Cristo, nga'n̄ó-l̄a Nainá-ní; k̄o ti'koaá kjoachjine-l̄a Nainá-ní. ²⁵Jè kjoa 'tse Nainá ra ta kjoaská ma-l̄a x̄it̄a isà'nde, isaá ta 'n̄ó kjoachjine jnchro-ni koni nga'tsi jñà kjoachjine-l̄a x̄it̄a isà'nde. Jè kjoa 'tse Nainá ra tsò-l̄a x̄it̄a nga tsìn-l̄a nga'n̄ó, isaá ta 'n̄ó tjín jnchro-l̄a nga'n̄ó koni jñà nga'n̄ó ra tjín-l̄a x̄it̄a isà'nde.

²⁶Nda tikítsjen ndí 'ndsé k̄o ndí tichjeé, 'kīa nga jè Nainá xá kiichja-no, 'n̄ó chiba ma-najiòn ra x̄it̄a chjine tsò-no x̄it̄a isà'nde, k̄o ti'koaá 'n̄ó chiba ma-no ra x̄it̄a ítjòn titsahijyo, k̄o ti'koaá 'n̄ó chiba ma-najiòn ra ya nakjoá-no a'ta 'tse x̄it̄a ítjòn. ²⁷Tanga Nainá jñà tsjahíjin jñà x̄it̄a ra m̄i k̄i machiya-l̄a i isà'nde, mé-ni nga kosabà-l̄a jñà x̄it̄a ra tjín-l̄a kjobítsjen. K̄o jñà tsjahíjin jñà ra tsò-l̄a x̄it̄a isà'nde nga m̄i ti mé chjí-l̄a mé-ni nga kosabà-l̄a jñà ra x̄it̄a ítjòn. ²⁸Jè Nainá jñà tsjahíjin ra ima, k̄o ra bitjongi, ra tsò-l̄a x̄it̄a isà'nde nga nímé chjí-l̄a mé-ni nga kitjongi-ni jñà ra títsajna ítjòn, ²⁹mé-ni nga niyá ra ma 'nga s̄ik̄íjna ijo-l̄a ya ngixkon Nainá. ³⁰Nga jè sabá Nainá isíkítsajnakjoko-ná Cristo; ti'koaá jé-te ra k̄oki'sin nga a'ta 'tse Cristo sakó-ná jè kjoachjine, nga jé Cristo ra x̄it̄a kixi 'sín-ná ya ngixkon Nainá, k̄o a'ta 'tse-ní nga matsje jè iníma-ná, k̄o jé-ní ra tsikíchjítjì jé ra tjín-ná mé-ni nga ma bitsajnandíj-ná; ³¹mé-ni nga k̄o'sín katama-ni koni 'sín tíchja Xajon-l̄a Nainá ra tjí'ta 'én-l̄a nga tsò: “Jè ra jeya síkíjna ijo-l̄a, ta isaá jnchro jè Nainá jeya katasíkíjna.”

**Kó'sín nga jé tí'senajmíya 'én
a'ta 'tse kó'sín nga kisi'ta krò jè Jesús**

2 ¹Ndí 'ndsè kò ndí tichjeé, 'kia nga tì'sa ijchòò nãnda nga titsajna jìdò nga ítsi'kenajmíya-no 'én-la Nainá, mì tsa jè 'én kíchjà-no 'én ra maxkón-la xita 'kia nga 'nchré, kò mì tsa jñà 'én ra chja xita ra 'nò tjín-la kjoachjine ísichjéén. ²Ta isaá jnchro, 'kia nga tsakátijnajin-no, ítsikijngó-la takoàan nga mì tsa kjíí kjoa ísikítsjeen; ngi ta jè kíchjà-no a'ta 'tse Jesucristo, kò kó'sín nga 'ken ya a'ta krò. ³'Kia nga ya tsakátijnajin-no, ta indakjoáá tímaá nga títsakjoon, kò sí tífatsé-na. ⁴Kò jñà 'én ra kíchjàa 'kia nga tsí'kènájmíya-no jè 'én nda-la Nainá, mì tsa a'ta 'tse kjoachjine-la xita inchrabà-ni nga kjokjiín-no; ta jé Inìma Tsje-la Nainá tsakón nga'nó-la nga kò'sín kjokjiín-no 'kia nga kíchjà-no. ⁵'Koaá ma-ni, koni 'sín nga makjiín-no a'ta 'tse Nainá, mì tsa a'ta 'tse kjoachjine-la xita isà'nde nchrabá-ni; yaá nchrabá-ni a'ta 'tse nga'nó-la Nainá.

Kjoachjine ra ngi a'ta 'tse Nainá nchrabá-ni

⁶Kixíí kjoa, 'én chjineé nakjoá-lajin jñà xita ra ijye kjimajchá koni 'sín nga makjiín-la a'ta 'tse Cristo. Tanga mì tsa kjoachjine 'tse xita isà'nde-jìn, kò mì tsa 'tse-jìn jñà xita ra tjíhijyo ítjòn, jñà ra ta ya chija nga'nó-la. ⁷Ta jé nakjoá-jìn kjoachjine-la Nainá ra kji'ma, jè kjoachjine ra jí'ma-la ra kò'sín iskosòn-la skanda 'kia nga tikje sinda isà'nde nga jién jeya kitsajna-ná. ⁸Jè kjoachjine rakli, nijngo xita ítjòn ra tjín í isà'nde kjòchiya-la. Nga tsa kjòchiyaá-la tsiki, mì-la kì kò'sín krò tsaká'ta jè Nà'ín-ná ra 'nó jeya tjina. ⁹Tanga, 'koaá 'sín tíchja jè Xajon-la Nainá ra jí'ta 'én-la, nga tsò:

Jè kjoa ra kjè yá be,
kò nì kjè sa yá ra 'nchré,
kò niyá ra machiya-la,
jñá kjoa kì ra tjínda-la Nainá
a'ta 'tse jñà xita ra tjín-la kjotsjacha ra a'ta 'tse jè.

¹⁰A'ta 'tseé Inìma Tsje-la nga tsakón-najin kjoa kì, nga jè Inìma Tsje-la Nainá, bátsjiya ijye-ní ta mé kjoa-nì, skanda jñà kjoa 'tse Nainá ra 'nó i'in-ya tjín. ¹¹Nga, ¿yá xita-ni ra be kó'sín tjín kjóbítsjen-la xita ra kjíí? Jngo xita, tà jé inìma-la tjíin-la kó'sín tjín kjóbítsjen-la. 'Koaá tì'sín tjín ra a'ta 'tse Nainá, niyá

ra be kó'sín t́jín kjobítsjen-la, tajngoó jè Inìma Tsje-la ra be kó'sín t́jín. ¹²Mì tsa inìma-la xita isà'nde-jìn ra itjábé-najìn, jé Inìma Tsje ra a'ta 'tse Nainá nchrabá-ni, mé-ni nga kochiya-najìn, mé ta kjetjò-ni ra títsjá-ná Nainá. ¹³Jñá kjoa kii ra nakjoá-jìn, jñá 'én ra jè Inìma Tsje-la Nainá bakón-ya-najìn, mì tsa jè kjobítsjen 'tse xita isà'nde nichjeén-jìn. Jñá-ní ra 'tse Inìma Tsje-la Nainá nichjeén-jìn nga 'benajmíya-jìn kjoa ra 'tse Inìma Tsje-la.

¹⁴Jè ra tsìn-la Inìma Tsje-la Nainá ya ajin inìma-la, mì kì kjábé jñá kjoa ra síchiya-ná jè Inìma Tsje-la Nainá. Nga tà kjoaská ma-la. Mì kì machiya-la; nga jñá kjoa kii, ta yaá machiyajin-ná a'ta 'tse Inìma Tsje-la Nainá. ¹⁵Tanga jè xita ra Inìma Tsje-la Nainá t́jnajin ya inìma-la, ndaá skoó'tajin ijye kjoa 'tse Nainá, tanga niyá ra ma skoó'tajin jè kjoa-la ra jè. ¹⁶'Koaá 'sín tíchja Xajon-la Nainá ra t́j'ta 'én-la, nga tsò: “Niyá ra be kó'sín t́jín kjobítsjen-la Na'ín-ná. Kò niyá ra ma kòkòn-ya-la.” Tanga jién, jé kjobítsjen-la Cristo t́jín-ná.

Jñá xita ra síxá a'ta 'tse Nainá ya Corinto

3 ¹Ndsé kò tichjeé, 'kia nga 'sa ítjòn, mì kì kjomà nda ít sakakó-no koni tsa jñá xita ra nda tí síxájin ya inìma-la jè Inìma Tsje-la Nainá, ta 'koaá 'sín ít sakakó-no koni tsa xita isà'nde 'mì-no koni tsa 'sa ixti-xó jìòn ra kjoa 'tse Cristo. ²Kif ít sakon-yá-no kjoa ra mì tsa chjá t́jín, koni 'sín nìkò jñá ixti-xó ra 'sa inchibaki nga ta tsjín 'bi kò mì tsa tsajmì ra tája kjine; nga kjè kì ma-najìòn tsa kotjín ra chjinee, kò skanda 'ndi 'ndi, takó kjè kì nda fíya-no kó'sín t́jín kjoachjine-la Nainá. ³Nga takó 'koaá 'sín inchi'nià jìòn koni 'sín 'sín ra taxki xita ra bátsji kjoa ra síjé ijo-la. 'Kia nga takó t́jín-no kjoachini kò nga t́jìòn chitikjòè-no, ¿a mí tsa kò'sín inchi'nià koni tsa taxki xita isà'nde ra bátsji kjoa ra síjé ijo-la? ⁴'Kia nga t́jín i'ka jìòn ra bixó: “An, xita 'tse Pablo-ná”, kò jè ra ijngo tsò: “An, yaá fì'ta-la jè Apolos”, ¿a mí tsa ta kjobítsjen 'tse xita isà'nde ra inchinìchjeén jìòn, 'kia nga kò'sín bixó?

⁵An ra Pablo kò jè Apolos, mì tsa yá-najìn. Tà xita chi'nda-najìn ra a'ta 'tse Nainá. Jíín isìchjeén-najìn Nainá nga kjokjiiín-no ra a'ta 'tse Cristo koni 'sín nga jngó jngó-najìn, kja kitsjá xá kja kitsjá xá-najìn Nainá. ⁶An-ná koni jngo xita ra tsikítje kò jè Apolos koni jngo xita ra tsikíngi-la nandá, tanga

jè Nainá ra isikihijin-ni. ⁷Jè ra bítjè, kò jè ra bíngi-là nandá, mì tsa 'nó chjí-là ra jñà; ta jngo jè Nainá ra 'nó chjí-là, nga jé kjón-ni ra síkihijin tsajmì ra sitjè. ⁸Jè ra bítjè kò jè ra bíngi-là nandá ta jngoó xá inchi'sín, ni'sín jè Nainá, kja tsjá kja tsjá-là chjí-là koni 'sín tjín xá ra 'sín. ⁹Ra jin, yaá taña níxákjo-jin a'ta 'tse xá-là Nainá. Kò jiòn-nájiòn koni jngo nangi ra a'ta 'tse Nainá ñanda nga tjítjè-là tsajmì. Kò ti'koaá jiòn-nájiòn koni jngo ni'ya chrjó-là Nainá ra jin inchi'binda-jin. ¹⁰Jè kjonda-là Nainá ra 'an itjábé-na, jé-ní nga 'aán tsikí'tin-na koni jngo chjine chrjó ítjòn nga tsikíjna tjà'tsin kjoa 'tse Nainá koni jngo chrjó-là ni'ya. Kò kjí'í-ní jè ra bako-là nga bíndasòn-isa. Tanga machjeén-ní nga nda katakotsjen-là nga jngó jngó, a ndaá inchi'bínda-són'nga. ¹¹Nga mì tì yá ra koma-là kijina tjà'tsin ijngo-isa, koni jè ra ijye tjina tjà'tsin, ra ngi jè saba Jesucristo. ¹²Tanga tsa yá ra kiindasón'nga-là jè tjà'tsin chrjó rakìi nga sìichjeén ra ngi kichà sinè, kò tsa jñà ra kichà chroba, kò tsa jñà najo ra 'nó chjí chjí-là, kò tsa yá sìichjeén, kò tsa jñà xka ndijyi kò tsa jñà xkajén. ¹³'Kiaá nda jcha-là jè xá ra 'siin nga jngó jngó xita, 'kia nga kijchò nichjin nga sindajín ijye-là xita nga'tsi jé-là; nga ngi koó ni'í kjí'í 'kia kijchò jè nichjin; kò jè ni'í skoó'ta jè xá ra ki'sín nga jngó jngó xita. ¹⁴Tsa mì kì jtì jè xá ra kjomà, jè ra tsikínda xá rakìi, tjábé-là chjí-là. ¹⁵Tanga tsa tjín i'ka xita ra jtì xá-là, jè ra ki'sín xá rakìi, sìichjija chjí-là. Tanga kotojín ra kjohi'in, koni tsa batojin kjòn ni'í.

¹⁶¿A mí 'ya jiòn, nga ni'ya ingo-là Nainá ma jiòn, kò nga jè Inìma Tsje-là Nainá yaá tjínajin-no? ¹⁷Tsa yá ra sìikitsón-ña jè ni'ya ingo-là Nainá, jè Nainá, 'koaá ti'sín sìikò ngajo-ni jè ra ko'sín 'siin. Nga jè ni'ya ingo-là Nainá, tsje-ní; kò jiòn-nájiòn ra ko'sín ni'ya ingo-là Nainá 'mì-no.

¹⁸Kì yá ra tijè ijo-là kondacha-ila; tsa títsajnajin i'ka-no ra ko'sín tsò-là ijo-là nga 'nó tjín-là kjochjine ra ta kjobítsjen 'tse isà'nde, isaá nda-ni tsa ko'sín kata'sín koni tsa nimé machiya-là, mé-ni nga koma sakò kiti-là ra ngi kjoachjine 'tse Nainá. ¹⁹Nga ta kjoaská-ni ya ngixkon Nainá, jñà kjoachjine ra ta kjobítsjen 'tse xita isà'nde. Nga 'koaá 'sín tíchja jè xajon ra tjí'ta 'én-là Nainá, nga tsò: “Jè Nainá, tjí'ña síchjeén-ni kjoa maña ra 'sín xita chjine mé-ni nga tjí'ña kàjin-ni kjoa.”

²⁰Ti'koaá tsò-te india-ni jè xajon ra tjí'ta 'én-là Nainá: “Jè Na'ín-ná be-ní nga nimé chjí-là jñà kjobítsjen-là xita ra

chjine tsò-la ijo-la.” ²¹ 'Koaá ma-ni, kì nijngo xita 'nga níkjina jìòn, nga nga'tsi kjonda ra tjín, kjonda tsajìòn-nó: ²² koni jè Pablo, koni jè Apolos, koni jè Cefas, koni jè isà'nde, koni jè kjobinachon, koni jè kjoabiya, koni jè nichjin ra titsajnee 'ndi-ni, kò nichjin ra 'sa nchrabá, sabà kjonda tsajìòn-nájiòn. ²³ Kò ra jìòn-jìòn, 'tse Cristo-ní, kò jè Cristo 'tseé Nainá.

Xá ra 'sín xita ra tsikíxá-la Jesucristo

4 ¹ 'Koaá 'sín jchatakòn-nájin koni tsa tà xita chi'nda ra síxá-la Cristo, nga ngajín kjongatsja-jin nga 'kénajmí-jin kó'sín tjín kjoa ra tjí'ma ra a'ta 'tse Nainá. ² Tanga jñà xita ra kò'sín bako-la nga mangatsja jngo xá, machjeén-ní nga kò'sín kata'ya-la nga xita kixi-ní. ³ Mì tsa jè síkájno jiàan, tsa kó'sín bixó jìòn ra a'ta tsa'an, a ndaá tí'siaan o ra 'choó tí'siaan, kò kó'sín tsò jñà xitaxá ra ma-la bíndajín-la xita isà'nde, kò skanda mí tsa tì ijo-na kotsíjen-jnó-na nga bíndajín-la mé kjoa ra 'siaan. ⁴ Ní'sín kò'sín tsò-na kjobítsjen-na nga mí tsa mé jé tjín-na, mì tsa tsò-ni kjoa nga xita kixi-ná ra 'an; nga jé saba Na'ín-ná ra bíndajín-na ra 'an. ⁵ 'Koaá ma-ni, kì tà chjàn jìòn tjen chibàya-no kó'sín inchisíxá nga jngó jngó xita; jchíñakjoa-la skanda 'kia nga kj'íí india-ni jè Na'ín-ná, nga jé ra nda síkatsíjen nga'tsi mé kjoa ra títsajnajin jñà xita ya ñánda nga jñò chon, kò jè nda síkatsíjen kó'sín tjín kjoa ra tjíjin ya iníma-la; akjòn 'kiaá jè Nainá 'nga síkíhijyo nga jngó jngó xita koni 'sín nga bakèn-la.

⁶ Jìòn ndí 'ndsé kò ndí tichjeé, 'koaá 'sín tsikijná jngo-no xkósòn ra kjonda tsajìòn 'kia nga kíchjà-no a'ta 'tse Apolos kò ra a'ta tsa'an, mé-ni nga mì kì tsa kotonè-la koni 'sín nga tíchjà xajon ra tjí'ta 'én-la Nainá. Kì kò'sín jngo chi'nda-la Nainá isa nda nachrjengio koni ra ijngo. ⁷ ¿Yá ra nachrjengio jìòn ijo-no? ¿A 'koaá 'sín níkítsjen jìòn nga batoó 'ñó 'ya jìòn? ¿Mé ra tjín-najìòn ra tà nga'ño tsajìòn? ¿A mí tsa Nainá kitsjà-no nga'tsi kjoa ra ma-no? Tsa a'ta 'tse Nainá itjábé-nájiòn, ¿mé-ni kò'sín 'nga mahíko-no takòn koni tsa ta nga'ño tsajìòn-no nga ma isakò-najìòn nga'tsi ra tjín-no? ⁸ Mé ta nda-ni nga nda titsahijyo. Ijyeé isakò-no kjoanchiná ra a'ta 'tse Nainá, kò ijyeé 'ñó ski tjín iníma-no, ijyeé mì tì mé ra chija-no ra a'ta 'tse Nainá, skanda ijyeé jìòn inchibatexoma ítjòn, skanda kjeé batexoma-najin ra jin. Mé ta nda-ni nga

ijye ko'sín in-chibatexoma. Yaá-la kotexomakjoko-lajin.

⁹'Koaá 'sín ma-na ra 'an, jin ra tsikíxáya-najin Jesucristo, jin in-chisíkjehe'ta-najin Nainá, 'koaá 'sín kjòn-jin koni xita ra ijye tjínè-la nga kiyá. Nga'tsì kjoa ra in-chima'tin-jin i isà'nde, 'koaá 'sín ta 'cho in-chikotsíjen-jnó-najin jñà xita ko jñà ikjalí. ¹⁰'Koaá 'sín 'yatákon-najin ra jin koni tsa nimé machiya-najin, ta ngatjì-la ra a'ta 'tse Cristo. Ko ra jiòn, 'koaá 'sín bitjongi jiòn koni tsa 'ñó nda machiya-najiòn ra a'ta 'tse Cristo. Ra jin, 'koaá 'sín kjòn-jin koni tsa tsìn-najin nga'ñó, ko ra jiòn, koni tsa 'ñó tjín-no nga'ñó; ra jin, tínachrjengíí-najin, ko jiòn, ndaá tí'yaxkón-no. ¹¹Skanda 'ndi-ni, kjinchrá in-chibato-jin, skanda tsìn-najin nandá ra 'yo-jin, tsìn-najin nikje ra tsjaya-jin, in-chi'yatoón-najin, ko tsìn jngo-najin ni'ya ñánda nga tsijen titsajna-jin, ta timasòn-nájin. ¹²Jñá ndsa-jin in-chinìchjeén-jin nga in-chiníxá-jin ko nga in-chinìki'òn-jin ijo-najin. 'Kia nga 'cho tsò 'én ra chja'tin-najin xita, ta isaá nda tsò 'én ra nakjoá'tin-jin ra jin, ko tsa 'kia nga yá ra kjaán-ko-najin, chíkjoaá-najin. ¹³Tsa yá ra chjajno-najin, ta isaá nda niko-jin ra jin. Skanda 'ndi-ni, 'koaá 'sín betákon-najin jñà xita koni tjé-la isà'nde, ko koni jñà tsajmì ra mì tì mé chí-lá.

¹⁴Mì tsa ki xá tíbindá-najiòn xajon nga tísísaba-no. Ta jé-ní nga tíbiyáchiya-no koni tsa ixti-na ra tsjake. ¹⁵Ni'sín-la te jmi ma-ni xita ra in-chisíkkonda-no nga bakón-ya-no ra a'ta 'tse Cristo, tanga jngo kjón-ni jè ra ko'sín tíjna koni tsa na'in-no ma. 'An-ná ra koni na'in-no ma, nga 'aán ítsakon-yá ítjòn-no jè 'én xitse ra nda tsò mé-ni nga kjomá kjokjín-no a'ta 'tse Cristo Jesús. ¹⁶'Koaá ma-ni nga ko'sín tíbitsá'ba-no nga ko'sín chjínjí-ná jiòn koni 'sín tí'siaa ra 'an. ¹⁷'Koaá ma-ni nga ko'sín ísikásén-no jè Timoteo, ra ko'sín tíjna koni i'ndí-na ra 'ñó matsjake ra kixi tísíkitjasòn xá-la Na'in-ná. Jè síkítsjen-yá-no kó'sín tí'siaa ra 'an ra a'ta 'tse Cristo ko kó'sín nga bakon-yáa ta ñánda nga bajmee ko nga tíngo ñánda nga tjín xita naxindá-la Cristo. ¹⁸Tjín i'ka xita xàngioo jiòn ra 'ñó 'nga ikon, nga 'koaá 'sín síkítsjen tsa mì tì kì kijcho katsíjen-no. ¹⁹Tanga tsa jè Na'in-ná ra ko'sín mejèn-la kijchò'tsè nditoón-najiòn. Ko 'kiaá skeep kjòn kó'sín chja jñà ra ko'sín 'nga ikon in-chi'sín; mì tsa ta jè-jin nga kó'sín chja, jè ra mejèn-na nga skeep a tjín kiti-la nga'ñó koni 'sín nga tsò. ²⁰'Kia nga jè saba Nainá batéxoma-la xita, mì kì

machjeén nga ta 'én ra kichja, jè nga'nó-la Nainá ra machjeén.
 21 ¿Kó'sín mejèn-najiòn? ¿A jé ra mejèn-no nga ngi ko kjojtina
 kijchò'tsè-no? ¿O ra jè mejèn-no nga ngi ko kjonda-na ko
 kjotsjacha-na kijchò'tsè-no?

**Kó'sín tjin kjoa 'tse jé ra tjin ya ajin
 naxindá-la Nainá ya Corinto**

5 1 Nga skanda ijyeé ko'sín na'yá-la ra a'ta tsajiòn nga
 tjin ra kjoachijngi, jngo kjoachijngi ra skanda mí tsa
 ko'sín na'yá-la a'ta 'tse xita ra mi tsa Nainá bexon; skanda
 tijnajin jngo-najiòn ra ti najòn-la chja'nda-ni. 2 Ko jion,
 ¿mé-ni nga ta isa 'nga ma-ni takòn? Tsa nda kjòn-ni tjiné-la
 nga ba ki'se-najiòn, ko akjòn ko'sín tsi'kin-la xita rakii nga
 mi ti ya katasíngàsòn-ko-no. 3 Kixii kjoa, ra 'an, mi tsa ya
 tijnajin kjòn-no, tanga jè kjobítsjen 'tse inima-na yaá tijnajin
 masen-no; 'koaá jngoya-la koni tsa ya tijnako kjòn-no, ijyeé
 ko'sín tíxian ra 'an mé kjohi'in ra tjiné-la nga koko-la xita ra
 ko tjin jé tibatátsji. 4 'Kia nga kitsajnajtín jion, yaá kijnako-no
 inima tsje-na ko jè nga'nó-la Jesucristo ra tjna ítjòn-ná. Ko ngi
 koó jè kjotéxoma-la, 5 nga ya tingatsja jè xita rakii ya nánda
 nga jè xita-nii tibatéxoma mé-ni nga jè katatsjá-la kjohi'in
 ijo-la, [ko katasíkájno-ni jé-la nga mi ki ti ki jé koaátsji-ni]
 mé-ni nga kitjokajin-ni kjohi'in inima-la jè nichjin 'kia nga kjii
 jè Jesús ra tjna ítjòn-ná.

6 Mi ki nda tjin nga ko'sín jion 'nga mahíko kjobítsjen-no,
 nga ijyeé 'ya jion nga ni'sín ta itsé-ni na'yo san, sísan ijye-ni
 jè na'yo ra nda. 7 Tináchrjekajion jè xita ra ko'sín bátsji-jé
 koni tsa jè na'yo san ra mi ki ti nda-ni, mé-ni ko'sín koma-no
 koni tsa na'yo xitse ra jion, ra mi tsa na'yo san tjikójin-la. Nga
 jé Cristo ra 'ken ngajo-ná koni 'sín nga 'ken forré jè nichjin
 paxko 'kia nga itjojin ya nangi Egipto jña xita Israel. 8 'Koaá
 ma-ni ra jien, ko'sín sikítsjen-yé nga jé Cristo 'ken-tji ngajo-ná,
 nga chjáaxien ra kjoa'cho ko kjoa ra mi ki nda tjin, koni 'sín
 faháxin ra na'yo san jña xita Israel 'kia nga 'sí paxko, ko jè
 sichjeén jè ra ngi kjoa tsje ko kjoakixi, koni tsa niño nchrajín
 ra mi tsa na'yo san tjikójin-la.

9 Jè xajon ra isikásén ítjòn-no, 'koaá 'sín kixian-no nga ki ya
 fahijtakoo jña xita ra kjoachijngi 'sín. 10 Tanga mi tsa tsò-ni
 kjoa nga jngó kjá kitjokajin-la jña xita isà'nde ra kjoachijngi

'sín, ra tse tsajmì mejèn-la, ra x̄ita chijé, k̄o j̄nà ra jè bexkón nainá ra t̄jín i isà'nde. Tsa jìòn-la ra mejèn-no nga k̄o'sín 'siaan, t̄jíné-la nga jngó kjá kítjokajin-la jè isà'nde rak̄i. ¹¹ Jè 'én ra k̄o'sín k̄ixin-no 'kia nga ítsikindá-no xajon, jè-ní nga k̄i t̄i ya tsjahijtako-no jè ra x̄ita-la Cristo tsò-la ijo-la, k̄o tsa kjoachijngi t̄i'sín-ni, k̄o tsa jè ra mejèn-la nga isa tse 'se-la, k̄o tsa jè bexkón-ni nainá ra t̄jín i isà'nde, k̄o tsa 'én 'cho ch̄ja-ni, k̄o tsa x̄ita 'ch̄i-ni, k̄o tsa x̄ita chijé-ni. J̄nà x̄ita ra k̄o'sín inchi'sín, skanda k̄i ya taña bichikoo. ¹²⁻¹³ Mì tsa jién bako-ná nga k̄indajín-lá j̄nà ra x̄ita isà'nde; jé Nainá k̄iindajín-la ra j̄nà; tanga jión bako-no nga k̄indajín-la j̄nà x̄ita nax̄indá-la Nainá ra tsajìòn. 'Koaá ma-ni nga k̄o'sín xin-no: Tináchrjekajìòn jè x̄ita ra 'cho t̄i'sín ra ya t̄ijnajin-no.

**Kó'sín nga machjeén nga t̄jién k̄indajín-lá
xàngioé ra x̄ita-la Cristo 'mì-ná**

6 ¹ Jìòn, tsa 'kia mé kjoa ra t̄jín-no k̄o x̄ita xàngioo, ¿kó tsò takòn jìòn nga j̄nà x̄itaxá-la x̄ita isà'nde níjé-la nga kát̄indajín-no? ¿Mé-ni mì tsa j̄nà níjé-la x̄ita nax̄indá-la Cristo nga j̄nà kát̄indajín-no? ² ¿A mí 'ya jìòn, nga jién-ná ra x̄ita nax̄indá-la Cristo 'mì-ná k̄indajín-lá j̄nà x̄ita isà'nde? K̄o tsa jién bako-ná nga k̄indajín-lá ra x̄ita isà'nde, ¿a mí ma-no ra jìòn nga bindajín-la xàngioo kjoa ra ta chiba ch̄já t̄jín nichjin 'ndi? ³ ¿A mí tsa ijye t̄j̄jín-no nga skanda jién k̄indajín-te-lá j̄nà ìkjalì? Tsa 'koaá 'sín jién bako-ná nga k̄indajín-lá j̄nà ìkjalì, ¿a ta j̄nà kjoa ra ma i isà'nde mì k̄i ma-ná k̄indajién? ⁴ Tsa ta kií kjoa ra t̄jín ki'ta ya isà'nde t̄jín-najìòn, k̄o jìòn ra títsahijyo ítòn mì k̄i ma-no bindajìòn, ¿mé-ni nga j̄nà 'nià-no x̄itaxá-no j̄nà ra mì tsa ya 'nó títsajna ya ajin nax̄indá-la Nainá? ⁵ Kíí k̄o'sín t̄ixin-no mé-ni nga katasabá-no. ¿A sí mí t̄ijnajin jngo-najìòn ra x̄ita xàngioo ra t̄jín-la kjobítsjen nga koma-la k̄iindajín-no ra 'ndse chibà? ⁶ Mì tsa tà jè-jìn nga t̄jiòn bixkàn-koo-no xàngioo, skanda yaá mahíkoo kjosì ra t̄jín-no ya ngixkòn x̄itaxá ra mì tsa ya makj̄iín-la a'ta 'tse Cristo. ⁷ Jngo kjoa ra 'nó 'cho t̄jín koni 'sín nga inchima'tin jìòn nga t̄jiòn bixkàn-kjo-no. ¿Mé-ni mì tsa ta nìkjiín-no 'kia nga kó nìko-no, k̄o tsa tà jyò bitsajna 'kia nga machijé-no? ⁸ Tanga jìòn, ta isaá 'nó 'cho t̄jín kjoa ra 'nià; k̄o skanda t̄jiòn nichijé-la xàngioo ra 'ndse chibà.

⁹ ¿A mí 'ya jiòn nga jñà xità ra mì tsa kjoàkixi 'sín, mì kì ma kjoàha'sen-jin ya i'nde ñánda tíbatéxoma Nainá? Jñà ra xità chijngi, jñà ra ta xkósòn 'tse xità bexkón koni tsa nainá, jñà xità ra ijye ixan kò takó kjoàchijngi 'sín, kò jñà xità 'xin ra tì xità 'xin xákjén fahijoko-nì, ¹⁰ jñà ra xità chijé, jñà ra mejèn-la nga tse 'se-la tsajmì, jñà ra xità 'chi, jñà ra chjajno-la xità xákjén, kò jñà xità ra kondacha-la xákjén nga síchijé-la; kì tà chjàn bìndocha-la ijo-no, nga nijngo xità ra kotjín kjoa'cho 'sín koma kijchò ya ñánda tíbatéxoma Nainá. ¹¹ 'Koaá kjòn i'ka jiòn nga tì'sa kjotseé, tanga 'ndì 'ndì jè Nainá ijyeé tsiníjno jè jé-najiòn, kò ijyeé tsikítsahijyo'taxìn-no ra a'ta 'tse jé, ijyeé xità kixi ki'sìn-no; ngi koó nga'ño-la Jesucristo ra tíjna ítjòn-ná kò nga'ño 'tse Inìma Tsje-la Nainá nga kò'sín kisiko-no.

Kó'sín nga jé Nainá jeya sikhíjneé a'ta 'tse ijo-ná

¹² Tjín i'ka jiòn ra bixó: “Maá 'siaan tà mé ra mejèn-na.” Kixí kjoa, ma-ní, tanga mì tsa ta nga'tsi-ni kjoa nga kjen ndiyá-ná; 'koaá ma-ni nga mì kì tsja'ndé-la ijo-na ñáa kjoa ra sikhijne-na. ¹³ Tsó 'én ra tjín: “Tsajmì ra chineé, 'tseé indsi'bé kò jè indsi'bé, jè machjeén-la tsajmì ra chineé.” Tanga ta ngajò, jè Nainá sikhjehe'ta nichjin-la. Tanga jè ijo-ná, mì tsa ki xá-la nga kjoachijngi 'sieén, kíí xá-la nga a'ta 'tse Nainá síchjeén, nga jè ijo-ná, 'tseé Nainá. ¹⁴ Koni 'sín ki'sín Nainá, nga isikjaáya-la jè Na'ín-ná Jesús, 'koaá tì'sín ngi koó nga'ño-la nga sikhjaáya-ná ra jién. ¹⁵ ¿A mí tjíjin-najiòn nga jè ijo-ná yaá majngoko ijo-la Cristo? ¿A maá síchjeén jè ijo-la Cristo nga ya sijngokeé ya ijo-la jngo chjoón skáya? Majìn, mì kì koma. ¹⁶ Kò, ¿a mí tjíjin-najiòn? Tsa 'kia jngo xità 'xin, jngo chjoón skáya kjójnako, jngoó ijo ma-ni. Nga 'koaá 'sín tíchja Xajon-la Nainá nga tsò: Ta jngoó ijo kama-ni ngajò. ¹⁷ Tanga jè xità ra jè Na'ín-ná tíjnako-kò, ta jngoó inìma tsje ma-ni. ¹⁸ Tìncha'taxìn-la kjoachijngi ra síjé ijo-no. Ta mé-isa jé ra bátsji xità, mì tsa ijo-la beton; tanga jè xità ra kjoachijngi 'sín, jè ijo-la beton. ¹⁹ ¿A mí 'ya jiòn nga jè ijo-najiòn jè ma ni'ya-la Inìma Tsje-la Nainá ra jè Nainá kisìngatsja-najiòn nga yaá tíjnajin ya inìma-no? Jè ijo-najiòn, mì tsa tì tsajión-nájiòn. ²⁰ Jè Nainá ijyeé xá tsatse-najiòn, ijyeé tse tsikíchjítjì-no; 'koaá ma-ni jè Nainá jeya tikíjna jiòn ra a'ta 'tse ijo-no, nga jè Nainá, ijyeé jè chja'nda-no.

Kjoa 'tse xita ra bixan

7 ¹A'ta 'tse 'én ra ichjinangi-nájiòn nga inikasén-ná xajon nga bixó nga isaá-la nda tjin tsa mì kì kixan jñà xita. ²Tanga ta ngatjì-là nga ya naxindá-najìòn 'nó tjin ra kjoachijngi, machjeén-ni nga jngó jngó xita 'xin kata'se-là chjoón-là kò nga jngó jngó íchjín kata'se-la 'xin-la. ³Jè xita 'xin kò'sín nda katasísin-la jè chjoón 'kia nga kjojnako kò jè chjoón tì'koaá kò'sín nda katasísin-te-là jè 'xin-la 'kia nga kjojnako. ⁴Jè chjoón, mì tsa tì ta jè kinda-là ijo-la, ijyee 'tseé 'xin-la. Kò jè xita 'xin, tì'koaá mì tsa tì ta jè kinda-là ijo-la, ijyee 'tseé chjoón-la. ⁵Kì ijo-no nixkon-la xàngioo nga jngó jngó-no; ta 'kiaá-la tsa ngàsòn xá jchibaya-no tsa jè nichjin 'kia nga mejèn-no kítsa'ba-la Nainá; ra koma askan-nioo, machjeén-ní nga sisin india-ila xàngioo, mé-ni nga mì jè xita-ní skoóndacha-no 'kia nga tsa mì kì tì chíkjoaa-no nga xìn tsjáhiyyo-la xàngioo. ⁶Jè 'én ra kotíxian-no, ta 'an-ná ra kò'sín títsja'ndé-no, mì tsa koni jngo kjotéxoma tíbijná-no. ⁷Ra a'ta tsa'an ndaá-la 'se tsa nga'tsi xita ta kò'sín katitsajna koni 'sín nga tijná ra 'an, tanga nga jngó jngó xita kja kí'tsi kja kí'tsi jngo-la kjotjò ra 'tse Nainá nga kò'sín kítsajna, kja kj'í kja kj'í 'sín títsajna nga jngó jngó xita.

'Én ra tsijen xá kotíxian-na

⁸Jñà xita ra títsajna tajngo kò jñà íchjín ra ijye 'ken 'xin-la, ndaá-la tjin tsa ta kò'sín katitsajna tajngo koni 'an. ⁹Tanga tsa mì kì chíkjoa-la nga bitsajna tajngo, isaá nda-ni tsa katixan, mì 'koa-ni tsa jè kjoaská 'tse ijo-la siikijne-la.

¹⁰Tanga jñà ra ijye ixan, 'koaá 'sín tsja-la jè kjotéxoma rakij; tanga mì tsa tsa'an jiàan jè kjotéxoma, 'tseé Na'ín-ná. Kì tà chjàn tsjin-ni xákjién. Jè chjoón, kì tà chjàn tsjin-ni 'xin-la.

¹¹Tanga tsa tsjín-ni 'xin-la, kì tà chjàn kj'í 'xin bixan-kò india-ni; isaá nda-ni tsa katajoónda india-ni kò 'xin-la. Kò jè xita 'xin, kì tà chjàn tsjin-ni chjoón-la.

¹²Koaá 'sín tíxin-la jñà ra kj'í xita ra ta kjobítsjen tsa'an, mì tsa jngo 'én ra Na'ín-ná kitsjà: Tsa jngo xita 'xin ra makjiín-la 'én-la Nainá tíjnako jngo chjoón ra mì kì makjiín-la, tsa jè chjoón tsò ikon nga bijnako, kò'sín katijnako, kì tà chjàn tsjin-ni xákjién. ¹³Kò tsa jngo chjoón ra makjiín-la 'én-la

Nainá, mì kì makjiín-là jè 'xìn-là kò tsa tsò ikon nga bijnako chjoón-là, katijnako-ní, kì tà chjàn tsjin-ni xákjín. ¹⁴Jè xita 'xìn ra mì kì makjiín-là, a'ta 'tseé chjoón-là matsje-ni, [nga jè chjoón, makjiín-là 'én-là Nainá]. Kò jè chjoón ra mì kì makjiín-là, a'ta 'tseé 'xìn-là matsje-ni, [nga jè 'xìn, makjiín-là 'én-là Nainá]; tsa majìn, jñà ixti-là xita kii, mí-la tsa xita tsje koxki ya ngixkon Nainá; tanga 'ndi 'ndi, jñà ixti-là xita kii, ijyee tsje 'ya-là ya ngixkon Nainá. ¹⁵Tanga tsa jè xita ra mì kì makjiín-là 'én-là Nainá mejèn-là nga tsjín-ni xákjén ra 'én-là Nainá makjiín-là, katatsjin-ni. Nga mì kì tjínè-là nga kjo'ño kítsajnakò xákjén. Nga kíí xá kiichja-ná Nainá nga 'nchán kítsajneé. ¹⁶Tanga ndaá katasijin-li jì chjoón ra makjiín-li 'én-là Nainá, mì kì 'ya-ni tsa kíí-ni nichjin a'ta tsaji-ní nga koma kitjokajin kjohi'in jè 'xìn-li. Kò jì ra 'xìn 'mì-li ra makjiín-li 'én-là Nainá, mì kì 'ya-ni tsa kíí-ni nichjin a'ta tsaji-ní nga koma kitjokajin kjohi'in jè chjoón-li.

¹⁷Nga jngó jngó xita, machjeén-ní nga kò'sín katasíjchá ijo-là koni 'sín nga kitsjà-là Nainá kò koni 'sín nga kjòn 'kia nga tì'sa Nainá kiichja-là nga xita-là ki'sín. 'Koaá 'sín tjín kjohixi ra tsja-là nga'tsì xita naxindá-là Cristo. ¹⁸Tsa tjín i'ka xita ra ijye tí'ta chiba ijo-là ra kjoa 'tse circuncisión 'kia nga xita-là Cristo kjomà, ta kò'sín katitsajna, kò tsa tjín i'ka ra kjè kì tí'ta chiba ijo-là, kì tà chjàn tì bí'ta chiba-ni ijo-là. ¹⁹Nga mì tsa jè ra 'ño chjí-là tsa tí'ta chiba ijo-là kò tsa mì tí'ta chiba ijo-là; jé ra 'ño chjí-là tsa nda kitjasòn jñà kjotéxoma-là Nainá. ²⁰Nga jngó jngó-no kò'sín titsajna koni 'sín nga titsajna 'kia kiichja-no Nainá. ²¹Tsa 'kia nga kiichja-li Nainá tsa chi'nda 'ño tjini, kì tà chjàn makájno-li, tanga tsa maá bijnandíí-ni, tjnandíí-ni. ²²Jè xita ra chi'nda'ño tjina 'kia nga kiichja-là Nainá nga kjokjiín-là 'én-là, ijyee tjnandíí-ni 'ndi 'ndi ra a'ta 'tse Cristo. Tanga jè xita ra tjnandíí-ni 'kia nga kiichja-là Nainá, 'ndi-ni chi'nda'ño-là Cristo tjina. ²³Jè Nainá ijyee xá tsatse-najìòn; kì tà chjàn bi'nde jìòn nga kjíí xita chi'nda'ño-là 'sín-no. ²⁴Jìòn ndí 'ndsé kò ndí tichjeé, koni 'sín nga titsajna jìòn nga jngó jngó-no 'kia nga tì'sa kiichja-no Nainá, 'koaá 'sín titsajna ya ngixkon Nainá.

²⁵A'ta 'tse xita ra takó titsajna tajngo, tsìn jngo-na kjotéxoma ra tsja-là ra 'tse Na'ín-ná, tanga 'koaá 'sín kosòn-là ra 'an koni 'sín tsò kjobítsjen-na, nga jè Nainá 'ño kjòhìmake-na mé-ni

nga koma 'an koaà'tatákon-na xita. ²⁶Ta ngatji-la nga 'nó i'in chon nichjin ra titsajneé 'ndi 'ndi, 'koaá 'sín síkítsjen ra 'an, ndaá-la tjin tsa ta ko'sín katitsajna jña xita koni 'sín nga titsajna skanda 'ndi 'ndi. ²⁷Tsa tjin-li chjoón, kì tà chjàn jmi-nì, kò tsa tsìn-li, kì tà chjàn chjoón fatsji. ²⁸Tsa kixan-ní, mì tsa jé-ni; kò tsa jngo tsati xangó kixan, ti'koaá mì tsa jé tíbátsji; tanga 'koaá ma-na 'kia nga ijye kixan, kjohi'íin koto, kò jè ra majìn-na ra 'an tsa ko'sín katama'tin.

Kó'sín tjinè-la nga 'sieén jién ra makjiín a'ta 'tse Nainá

²⁹Ndí 'ndsé, mején-na nga nda katasijin-najìòn, tjin chiba-isa-ná nichjin nga ma sihitjasón-lá Nainá; 'koaá ma-ni jè xita 'xin ra tjin-la chjoón, ko'sín kata'sín koni tsa tsìn-la chjoón. ³⁰Kò jña xita ra kjoba títsajin, ko'sín katitsajna koni tsa mì ba tjin-la; kò jña ra 'sí tjin-la, ko'sín katitsajna koni tsa mì 'sí tjin-la; kò jña ra batse tsajmì, ko'sín kata'sín koni tsa mì mé ra tjin-la. ³¹Kò jña ra fitjìngi-la kjoa ra tjin i isà'nde, ko'sín kata'sín koni tsa mì ya inchifitjìngi-la. Nga jè isà'nde ra titsajnasén, ta koto-ní.

³²Mején-na tsa nimé kjoa níkájno 'se-najìòn. Jè xita ra tìjna tajngo, jè síkájno kjoa ra 'tse Na'ín-ná kò mé kjoa ra nda sasén-la jè Na'ín-ná. ³³Tanga jè xita 'xin ra ijye tjin-la chjoón, jña síkájno kjoa ra tjin i isà'nde kó'sín isa nda kíjnako chjoón-la; ³⁴jò skoya kjoa tísíkájno. Ti'koaá jè chjoón ra tìjna tajngo kò jè tsati ra kjè kì bixan, kíí síkájno kjoa 'tse Na'ín-ná, kó'sín nga tsje sìkíjna ijo-la kò inìma-la. Tanga jè chjoón ra tjin-la 'xin, jé síkájno kjoa ra tjin i isà'nde kò kó'sín isa nda kíjnako 'xin-la.

³⁵Kjonda tsajìòn-najìòn nga ko'sín tíxian-no, mì tsa ki-ni nga 'an tìbatehjá-no. Kíí ko'sín tíxian-no, mé-ni nga nda kjón títsajna jìòn, nga mì ta kj'íí kjoa kotèkjáya-no nga sixá-la Nainá.

³⁶Tsa jngo xita ko'sín tíma-la nga mì nda tí'sín nga kjè bixan-kò chjoón ra ijye tíjnanda-la kò tsa ijyeé ijchó chiba-la nga kixan, 'koaá 'sín kata'sín koni 'sín tsò-la kjobítsjen-la; katixan-kò, nga mì tsa jé-ní. ³⁷Tanga jè ra ko'sín ngi kò inìma-la ijye iskosòn-la nga takó kjè ma kíjnako chjoón ra ijye tíjnanda-la, mì tsa yá ra kjo'nó tí'sín-la, tsa maá kichíkjoko-la ijo-la, ndaá-ni tsa mì kixan-kò. ³⁸Nga jè ra bixan, ndaá tí'sín, kò jè ra mì kì bixan, isaá ta nda tí'sín.

³⁹Jè chjoón ra ijye ixan, yaá itsabá'ñó 'xín-la 'kia nga tijnakon-isa jè 'xín-la, tanga tsa kiyá jè 'xín-la, ijyeé tijnandí-ni; komaá kixan india-ni nga kijnako ní'sín ta yá xita ra mejèn-la, tsa ta 'én-la Nainá makjiín-la. ⁴⁰Tanga 'koaá xiaa ra 'an, isaá-la ta nda-ni tsa ta ko'sín kijná tajngo jè chjoón ra ijye 'ken 'xín-la. Ko 'koaá ma-naa nga tjin-te-na jè Iníma Tsje-la Nainá, ko jé-la ra ko'sín tísichiya-na.

Tsajmì ra sinchá ya ngxikõn ra ta xkósòn

8 ¹Jè ra kjoa 'tse ijo-la cho ra biya a'ta 'tse xkósòn ra nainá tsò-la xita isà'nde, jìòn-jìòn bixó-nó nga nga'tsí-ná ijyeé tjin-ná kjoachjine a'ta 'tse kjoa kii. Kixí kjoa, tanga 'kia nga tjin-ná kjoachjine, ma'ngaá takén. Tanga 'kia nga tjin-ná kjotsjacha, isaá nda 'bì nga'ñó-lá xàngieé. ²Tsa tjin i'ka ra ko'sín síkítsjen nga ijyeé 'ñó nda machiya-la, takó kjè tsa nda be kjòn-ni koni 'sín tjinè-la nga ske. ³Tsa yá xita-ni ra tsjake Nainá, jè Nainá ndaá bexkon xita kii.

⁴'Koaá xián-no kó'sín tjin, a maá chine ijo-la cho ra biya a'ta 'tse xkósòn ra nainá tsò-la xita. Bixó-nájiòn nga ijyeé 'ya nga jngo xkósòn ra nainá tsò-la xita isà'nde, mì tsa mé nga'ñó tjin-la, nga ta jngoó ma-ni ra ngi Nainá. ⁵Ní'sín takó tjin ya ján ngajmi ko ya a'ta nangi jñà ra ko'sín nainá tsò-la xita. (Koni tsò-ni kjoa nga kjin ma-ni ra nainá ko ra na'ín-ná.) ⁶Tanga ra a'ta tsajién, ta jngoó ma-ni ra Nainá, jè ra Na'ín-ná ma, jè ra a'ta 'tse nchrabá ijye-ni nga'tsi tsajmì ra tjin; ko kíí xá titsajna-ná nga jè chja'nda-ná ra jién. Ko tí'koaá ta jngoó ma-ni jè ra tjiná ítjòn-ná, jè Jesucristo, jè ra a'ta 'tse nga'ñó-la ma isinda-ni nga'tsi tsajmì ra tjin, ko skanda a'ta 'tseé titsajnakon-te-ná ra jién.

Kó'sín nga tjinè-la nga kotsjacheé xàngieé

⁷Tanga mì tsa ta nga'tsi-ni xita ko'sín nda be kjoa kii; nga tjin i'ka ra ko'sín nga-la skanda kjotseé nga jñà bexkón xkósòn ra nainá tsò-la; takó 'koaá 'sín síkítsjen, 'kia nga kjine tsajmì ra ya mangatsja xkósòn, koni tsa takó inçhibexkón-ní. Ta ngatji-la nga inda tjin ya ajin kjobítsjen-la, 'koaá ma-la tsa inçhibátsji-jé-la ijo-la. ⁸Jìòn, 'koaá 'sín bixó jìòn, nga mì tsa a'ta 'tse tsajmì ra ma chine isa nda skaábétjó-ná Nainá. Tsa kichieé, mì tsa isa nda kjòn komeé; ko tsa mì kì kichieé,


mì tsa isa 'cho kjòn komeé ya ngixkõn Nainá. ⁹Kixí kjoa, ni'sín ko'sín tjín, tanga tikòndako-no jñà xàngieé, kì tà jiòn ngatjì-no nga koàtsji-la jé-la ijo-la jñà 'ndsé ra inda tjín-isa ya ajin kjobítsjen-la. ¹⁰Tsa tjín i'ka jiòn ra ko'sín tsò nga tjín-la kjobítsjen nga maá chine ta mé ijo-ni, tsa ya fì kàkjèn ya i'nde ñánda nga jeya tíníkijna xkòsòn ra nainá tsò-la xita, tsa ske jngo 'ndsé ra inda tjín ya ajin kjobítsjen-la, ¿a mí tsa tì'koa kjinchrabàjin ikon nga skine tsajmì kii? ¹¹Jè xita ra ya fì kàkjèn-ko jè kjobítsjen-la ra tsò, nga maá chine ijye ta mé tsajmì-ni, ta jè-ni ngatjì-la nga ya skajin jé jè 'ndsé ra inda tjín ya ajin kjobítsjen-la ra tì'koa jè Cristo 'ken-tjì ngájo-la. ¹²'Kiá nga ko'sín fatsji-jé jiòn ra a'ta 'tse jñà 'ndsé ko a'ta 'tse jñà tichjeé nga fatsji 'chin-la ya ajin kjobítsjen-la ra inda tjín, yaá-ni a'ta 'tse Cristo nga inçhifatsji-jé jiòn 'kiá nga ko'sín inchi'nià. ¹³'An, tsa ta jñá-ni ngatjì-la tsajmì ra kjíne nga koàtsji-jé 'ndsèe, isaá-la nda-ni nga mì tì ijo skíne-na mé-ni nga mì tì tsja jé skajin-ni.

Kjoa ra tjí'nde-la nga 'siin jè xita ra jè Cristo bíxáya-la

9 ¹¿Mé-ni mì kì makjiín-no koni 'sín nga xian-no? ¿A mí tsa jè Na'ín-ná Jesucristo xá tsikíxáya-na? ¿A mí tsa tjínandíaa ra 'an? ¿A mí tsa xkoàan kítse-na Jesús ra tjina ítjòn-ná? ¿A mí tsa jiòn ma jiòn xá-na ra a'ta 'tse Na'ín-ná? ²Ni'sín tjín i'ka xita ra ko'sín tsò nga mì tsa Cristo tsikíxáya-na; tanga tjíjiín-no ra jiòn nga jè tsikíxáya-na. Ko 'kiá nga ko'sín makjiín-no ra a'ta 'tse Cristo, yaá 'ya-la nga kixi kití kjoa nga jè tsikíxáya-na.

³'Kiá nga jngo xita kjonangi-naa ra kondra tsa'an, kii'sín xin-la nga básikotjiaa ijo-na. ⁴¿A mí tsa tjí'nde-najin nga 'ki-najin ra kichi-jin ko ra 'sio-jin? ⁵¿Ko a mí tjí'nde-najin nga kitjájmekó-jin ra chjoón-najin ma, ra tì'koa 'én-la Nainá makjiín-la, koni 'sín 'sín jñà xita ra i'ka ra tì'koa Na'ín-ná tsikíxáya-la, jñà ra 'ndse ma Na'ín-ná ko jè Cefas [jè ra tsò-ni Pedro]? ⁶Ko, ¿a ta 'aán-ná ko Bernabé ra kjo'ño tjínè-la nga sixá-jin nga sakò-najin ra ma chjine-jin? ⁷¿A tjín i'ka xita ra chíchàn síxá ra tjíñà bíchjí-ila ijo-la? Ko, ¿a tjín xita ra bítje ya ra baja-la to ra ma chine, ko mì kì kjine-ni jè to-la ra baja? Jñà xita ra tjín-la nchraja-tsjin, ¿a mí tsa 'bi tsjin ra bachrje-la? ⁸Kì tà chjàn ko'sín níkiítsjen jiòn, tsa tà kjobítsjen 'tse xita-ní

ra tísichjéen ra 'an. ¿A mí tsa ko'sín tichja-te kjotéxoma-la Nainá? ⁹Jon, 'koaá 'sín tichja jè kjotéxoma-la Nainá ra tsikínda Moisés, nga tsò: Jñà nchraja ra bínchi, kì tà chjàn na'ya bì'a-la tsa'ba. 'Én kù mì tsa ko 'sín tsò-ni nga Nainá 'ñó makájno-la a'ta 'tse nchraja; ¹⁰a'ta tsajién-né ra 'ñó makájno-la, ko a'ta tsajién-né nga ko'sín kisinda jè kjotéxoma-la Nainá. Nga jè ra síkínchi nchraja ko jè ra sítsje tsajmì ra majchá-la, tjíjngoó ikon nga inchikoñá-la nga tjábé chiba-la tsajmì. ¹¹'Kiá ngajin tsi'kènajmì-lajin 'én ra nda tsò, 'koaá 'sín jngoya-la koni



tsikitjeé jngo-jin tjachó ya ajin inìma-najiòn. ¿A sí taxki tsee inchiníjé-lajin tsa 'ki-nájin tsajmì ra machjeén-najin nga ma kitsajnakon-najin? ¹²Tsa jñà ra kj'íi xita, tjí'ndeé-la nga kjábé chiba tsajmì ra a'ta tsajiòn, ¿a mí tsa isa 'ñó tjí'nde-najin ra jin nga ti'koa tjábé chiba-najin?

Tanga mì tsa ko'sín inchi'nià-jin koni 'sín nga tjí'nde-najin; ta inchinikjiín-nájin ni'sín ta mé kjoa-ni, ta ngatjì-la nga majin-najin nga katasatéchjà-la jè 'én xitse ra nda tsò a'ta 'tse Cristo. ¹³Jiòn, ndaá tjíjin-no nga jñà xita ra ya síxá ya i'nde tsje-la Nainá, jñà kjine tsajmì ra ya tjín; ko jñà ra ya síxá ya i'nde ñánda nga jñà xita bísòn kjotjò-la nga síngatsja Nainá, bakoó chiba-la ijo-la cho ra ya sihiyosòn. ¹⁴'Koaá ti'sín ijye kitsjà kjohixi jè Na'ín-ná nga kitsò: Jè xita ra 'keènajmíya 'én xitse ra nda tsò a'ta 'tse Cristo, yaá katasakó-la mé tsajmì ra kíjnakon-ni. ¹⁵Tanga ra 'an, ni kjè tsa jè kjohixi rakìi sikjéen, ko ni mì tsa ki xá t'bindá-najiòn jè xajon rakìi mé-ni nga ko'sín siko-najiòn. Isáá nda-ni tsa katabiya jnchro, mì 'koa-ni

tsa yá ra kjoahíxìn-na jè kjòtsja ra tjín-na koni 'sín nga ta kjotjò 'benájmíyaa 'én xitse ra nda tsò.

¹⁶'Kia nga ko'sín 'benájmíyaa jè 'én xitse ra nda tsò a'ta 'tse Cristo, mì tsa ki-ni nga 'an jeya sikíjnaa ijo-na, nga xá 'koaá 'sín ijye tjínè-na nga 'siaan. Ima-ró-na tsa mì kì 'kenájmíya jè 'én xitse ra nda tsò a'ta 'tse Cristo. ¹⁷Tsa tà 'aán tsiki'tín-la ijo-na koni 'sín nga tí'siaan jè xá rakìi, tjínèa-na nga ton sikíjne; tanga tsa jngoó kjoa ra tjínè-na nga tísihítjasòon, tsó-ni kjoa nga jè xá ra Nainá kisingsatsja-na tísihítjasòon. ¹⁸Jè chjí-na ra tíjábé-na, jè-ní nga tjín-la kjòtsja jè iníma-na 'kia nga 'benájmíyaa 'én xitse ra nda tsò a'ta 'tse Cristo, nga mì tsa tísíki'chjí jiàan; nì'sín tí'nde-na nga a'ta 'tse 'én nda-la Cristo kótijnakon-na, mì tsa ko'sín tí'sin jiàan. ¹⁹Nì'sín tíjnandiáa, nga mì tsa chí'nda maa, tanga chí'ndaá tí'siaan ijo-na a'ta 'tse nga'tsì xita, mé-ni nga isa kjin xita koma 'kenájmí-la 'én-la Cristo nga katakjiín-la. ²⁰'Kia nga ya tíjnajin-la jñà ra xita judío, 'koaá 'sín 'siaan koni tsa xita judío-te ra 'an, mé-ni nga koma kichjà-la 'én-la Cristo nga katakjiín-la. Ko nì'sín ra 'an, mì tsa tí kjo'ño tjínè-na nga jè kjotéxoma-la Moisés síhitjasòon, tanga 'kia nga ya tíjnajin-la jñà xita ra kjo'ño bínè-la ijo-la nga kjotéxoma síhitjasòon, 'koaá tí'sín 'siaan ra 'an koni 'sín 'sín xita kii, mé-ni nga koma kichjà-la 'én-la Cristo nga katakjiín-la. ²¹'Kia nga ya tíjnajin-la jñà xita ra mì tsa ya inchimajchájin kjotéxoma-la Moisés, 'an, 'koaá tí'sín 'siaan koni jñà xita kii mé-ni nga ma kichjà-la 'én-la Cristo nga katakjiín-la. Tanga mì tsa ki-ni nga mì ya tímajchájaan kjotéxoma-la Nainá. Nga jé kjotéxoma-la Cristo tímajchájaan. ²²'Kia nga ya tíjnajin-la jñà xita ra takó inda ijncha a'ta 'tse Nainá, 'koaá tí'sín 'siaan ra 'an koni tsa takó inda tísen ra a'ta 'tse Nainá mé-ni nga ma kósiko-na nga tjó nga'ño-ni a'ta 'tse Nainá, jñà ra takó inda ijncha. Yaá síngásòn-ko ra 'an nì'sín takó kjòn xita, koni tsa ko'sín kji-te koni ra jñà, ta kó'sín-ni nga koma kochrjékajin i'kaa kjohi'in ra kjoa 'tse jé-la. ²³Kií ko'sín 'sin-naa kjoa kii ra ta ngatji 'tse 'én xitse ra nda tsò a'ta 'tse Cristo mé-ni nga a'ta 'tse sakò-te-na kjonda.

²⁴Jìon, ijyeé nda tíjjin-no 'kia nga mahachikon xita, nga'tsí-ni xita nga mahachikon, tanga ta jngo kjón-ni ra síkijne ko tjábé-la kjotjò. Jìon, ko'sín nda tíichikon ra a'ta 'tse Nainá mé-ni nga síkijne-no ko tjábé-no kjotjò ra tsjá. ²⁵Nga'tsì xita ra

sískákjo ya ñánda nga maská, nda kjón bitsajnanda ítjòn, mì tsa jñà síchjeén-jìn tsajmì ra 'cho síko. Kíí ko'sín 'sín-ni mé-ni nga sìikijne-ni nga ma tjábé-la kjotjò; tanga ra ma askan-nioo jè kjotjò ra 'bì-la, fitson-ní; tanga jién, jè bixkàn-tjié nga katatjábé jngo-ná kjotjò ra mì fitson skanda ta kjiá-nioo. ²⁶Mì tsa ta ko'sín tímahachikon ra 'an [ra a'ta 'tse xá-la Nainá] koni jngo xita ra mì kì be ñánda kijchò; ti'koaá mì tsa ko'sín tí'siaan koni jngo xita ra 'béjin 'bé'a isén 'kia nga 'bé-la chrjango xákjién nga kjaán-ko. ²⁷Ta isaá jnchro 'an, 'koaá 'sín biné-la ijo-na nga kata'se-na kjohi'in, mé-ni tsa 'kia nga ijye ítakon-yá-la xita ra kjíí, mì tsa ti 'an tsjin-tákon-na ijo-na nga sijchíja kjotjò ra tjínè-na nga síkíjne.

Kó'sín tjín xkósòn ra tjína-ná a'ta 'tse naxindá Israel

10 ¹Jìdòn ndí 'ndsé ko ndí tichjeé, nda kjón katasijin-no nga jñà xita jchínga kjin-ná, ['kia nga itjojin ya naxindá Egipto], yaá tsikimangi'ngién ya ifi [jè ifi ra kiji ítjòn-la], ko ti'koaá nga'tsiòo yaá tsatojin ya ndáchikon. ²Nga'tsi xita kii, yaá isatínda ya ajin-la ifi ko ya ajin ndáchikon mé-ni nga kjomà ya tsikitsajnajtín-ko-ni jè Moisés. ³Jngoó ndiyá tjín-ni tsajmì ra iskine ra a'ta 'tse kjojkón-la Nainá inchrabà-ni. ⁴Ti'koaá ta jngoó ndiyá-la nandá ra ki'tsi, ra ti'koa a'ta 'tse kjojkón-la Nainá inchrabà-ni ra itjokjá naxi ra a'ta 'tse Nainá 'ji-ni ra ya tsakáhihtako xita kii ta kó'sín nga kiji; ko jè naxi rakii jè Cristo-ní. ⁵Kjameé ta nga'tsi jñà xita kii, mì kì kisasèn-la Nainá koni 'sín nga ki'sin; 'koaá ma-ni nga ya 'ken ya i'nde a'ta xìn ñánda nga nangi kixi.

⁶Kia nga ko'sín kjomà ta nga'tsi kjoa kii, jngoó xkósòn isijna-ná ra jién, mé-ni nga mì ko'sín jñà síkjaájin-né kjoa ra 'cho tjín, koni 'sín ki'sin xita kii, nga jñà isikjahájin jñà kjoa ra 'cho tjín. ⁷Ko kì chjàn jñà minchaxkó'nchi'ta-la ko 'yaxkón jñà ra ta nainá xkósòn-la xita, koni 'sín ki'sin i'ka jñà xita kii, nga 'koaá 'sín tíchja xajon ra tjí'ta 'én-la Nainá nga tsò: “Jè naxindá tsijen kjón tsikitsajna nga tsakjèn ko nga ki'tsi, ko akjòn kisíská [nga kijtsexkón jè nainá xkósòn].” ⁸Ko mì tsa ko'sín kjoachijngi 'sieén ra jién, koni 'sín ki'sin i'ka jñà xita kii; nga 'koaá kjomà-ni nga sí kaján jmi 'ken nga ta jngo nichjin. ⁹Ko mì tsa ko'sín chjí'té Na'ín-ná koni 'sín ki'sin i'ka jñà xita kii nga iskó'ta Na'ín-ná, nga kíí jnchro ko'sín kjomà-ni nga ta

yeé tsi'ké-la nga 'ken. ¹⁰Ti'koaá mì kì ko'sín tsjájé'tá-lá Nainá, koni 'sín ki'sín i'ka jñà xitá kii nga tsjakjajé'ta-la Nainá, 'koaá 'sín kjomà-ni nga 'ji jngo ikjalì ra ma-la síkjehesòn xitá nga isì'ken jñà xitá kii.

¹¹Jngoó xkósòn isijna-ná ra jién 'kia nga ko'sín kjomà'tin jñà xitá kii, ko kií ko'sín isi'ta-ni ya Xajon-la Nainá mé-ni nga katachiya-ná nga mì ko'sín 'sieén, jién ra titsajnakeén nichjin ra tífehe'ta-ni 'ndi-ni. ¹²'Koaá ma-ni jè ra ko'sín tsò nga ijyee kixi tíjna ra a'ta 'tse Nainá, nda katasíkonda ijo-la nga mì jé skajin. ¹³Nga'tsi kjoa ra tíkajin jìòn skanda 'ndi-ni nga tíjtá'ta kjoa ra makjiín-no, jñá-ní kjoa ra ko'sín ma'tin ta ya xitá-ni. Tanga jè Nainá, ngi xitá kixí ra jè; maá jè kjó'ta takòn jìòn nga mì kì tsjá'nde ra jè nga isa tse kjohi'in síkjiín jìòn koni 'ki nga ma chíkjoako-no. 'Kia nga mé kjoa ra skajin jìòn, nga tjá'ta kjoa ra makjiín-no, jé Nainá skiíxa'nde kó'sín nga ma kítjokajion kjoa kii, mé-ni nga ma chíkjoako-no.

**Kó'sín tjínè-la nga síkítsjen-yeé a'ta 'tse
'kia nga tsakjèn-ko xitá-la Jesús**

¹⁴'Koaá ma-ni jìòn ndí 'ndse ra tsjake-no, kjiín tikíjna-la kjóbítsjen-no xkósòn ra nainá tsò-la xitá. Kì ni ta itsé jè 'yaxkón. ¹⁵'Koaá 'sín tíbakó-no koni tsa ijye xitá chjine jìòn; ya nda jchibaya-no koni 'sín nga tíxin-no. ¹⁶'Kia nga 'yé jè ra tjíya chitsín ra ijye kjòchikon'tin, yaá níngàsòn-kjeé ko jè jní-la Cristo, ko jè niño nchrajín ra nijòyeé, yaá níngàsòn-kjeé ko jè ijo-la Cristo. ¹⁷Ni'sín 'ño kjìn ma-ná ra jién, jngoó-ni niño nchrajín ra chineé, 'koaá ma-ni nga jngoó ijo ma-ná ta nga'tsi-ná jién.

¹⁸Chítsijen-la jñà xitá naxindá Israel, jñà ra kjine ijo-la cho ra mangatsja Nainá ya nándá nga biya cho, yaá síngàsòn-kjoko ko jè kjotjò ra mangatsja Nainá. ['Koaá ti'sín jngoya-te-la tsa jìòn chjinee ijo-la cho ra sí'ken-la nainá xkósòn-la xitá.] ¹⁹Ko, ¿kó tsò-ni 'én ra kotíxian-no? ¿A tsó-ni kjoa nga tjín-la nga'ño jñà cho ra ya biya-la nainá-la xitá isa'nde; ko a tsó-ni kjoa nga tjín-te-la nga'ño jñà nainá kii? ²⁰Majín; tsó-ni 'én ra kotíxian-no, 'kia nga jñà xitá ra mì kì bexkon Nainá sí'ken kjotjò cho, inìma 'cho-la ní-ní ra ko'sín síngatsja kjotjò-la, ko mì tsa jè-jìn Nainá. Ko majín-na ra 'an nga jè xitá-ní síngàsòn-ko jìòn. ²¹Mì kì nda tjín tsa 'kia ya 'yò jìòn jè ra tjíya

chĩtsín koni 'sín kitsjà kjohixi Na'ín-ná ko tĩ'koaá 'siòò jìòn jè ra ya sngàsòn-ko inìma 'cho-la níí. Tĩ'koaá mì kì nda tjín tsa 'kia nga bichi jìòn niño nchrajín nga ya níngàsòn-ko Nainá ko tĩ'koaá kichi-te jìòn nga sngàsòn-ko inìma 'cho-la níí. ²² ¿O ra mejèn-no nga sijti-la Na'ín-ná nga katamachini? ¿A isaá 'nó tjín-no nga'nó ra jìòn koni ra jè?

Kó'sín nga ta jé kjoa 'sieén ra jè Nainá jeya tikíjna

²³ Kíí 'sín tsò xitá nga tjí'nde-ní nga 'sieén ta mé kjoa ra mejèn-ná, tanga mì tsa ta nga'tsi-ni kjoa kjen-ná ndiyá. Ko tjí'nde-ná nga 'sieén ta mé kjoa ra mejèn-ná, tanga mì tsa ta nga'tsi-ni kjoa tsjá nga'nó-ná. ²⁴ Kì ta kjonda tsajìòn fatsjio, jè tjatsjio kjonda 'tse xitá ra kjíí.

²⁵ Maá chjinee ta mé ijo ra ijncha ñánda nga satína ijo; kì tà chjàn chjinangio ñánda nchrabá-ni, mé-ni mì síiskáko-no jè kjobítsjen-no. ²⁶ Nga 'tseé Na'ín-ná jè nangi ko nga'tsi tsajmì ra tjin-la.

²⁷ Tsa jngo xitá ra mì kì makjín-la a'ta 'tse Nainá, sííkjí'nchré-no nga kongí kichiod ya ni'ya-la, ko tsa mejèn-najìòn kongio; chjinee ta mé ra sihijyo-no ya asòn ímixa; kì tà chjàn chjinangio mé tsajmì-ni, mé-ni mì síiskáko-no jè kjobítsjen-no. ²⁸ Tanga tsa yá xitá ra kitsò: “Jñà ijo cho kii, jñà kàbiya-la koni jngo kjotjò jñà ra nainá xkòsòn”, yaá ijndáa kì tà chjàn chinee, ta ngatjì-la jè ra kokàtsò, ko mé-ni mì kì koskaya-la kjobítsjen. ²⁹ Mì tsa jè kjobítsjen ra tjíjin ya ajin inìma-no ra kotíxian-la, jè kjobítsjen-la jè ra ko'sín kàtsò.

Tanga tsa tjín i'ka ra skonangi nga kitsò: “¿Mé-ni satéchjà-na kjoa ra mejèn-na nga 'siaan ta ngatjì-la nga 'cho koma-la jñà kjobítsjen-la xitá ra i'ka? ³⁰ Tsa jè Nainá títsja-la kjonda a'ta 'tse tsajmì ra tikjine, ¿a ndaá tjín tsa 'cho 'kín-la tsajmì ra ijye kàtsja-la kjonda Nainá?” ³¹ Tanga jìòn, 'kia nga bichiod, 'kia nga 'yò, ko tsa mé kjoa ra 'nià-isa jìòn, kata'yaá-la nga jè Nainá jeya inchiníkijna jìòn. ³² Kì tà ngatjì tsajìòn-no nga jé skajin jñà ra xitá judío ko jñà ra mì tsa xitá judío, ko jñà ra xitá naxindá-la Nainá. ³³ Isaá nda tjín nga ko'sín 'tiaàn jìòn koni 'sín nga 'siaan ra 'an. Ta ñáa kjoa ra 'siaan, 'koaá 'sín 'siaan koni 'sín nda sasén-la nga'tsi xitá. Mì tsa kjonda tsal'an batsjía, jè jnchro batsjía kjonda 'tse xitá ra kjíí mé-ni nga ma katitjokàjin-ni jé-la.

11 ¹Ko'sín chj́ngí-nájiòn, koni 'sín tíkjingí-la 'an, jè Cristo.

**Kó'sín nga tjínè-la nga 'sìin íchjín ya
ñándà nga maxkóya xítà-la Nainá**

²Jiòn 'ndse kò tichjeé, ndaá tjín koni 'sín inchi'nià jiòn nga níkítsjen jiòn ra a'ta tsa'an kò nga'tsì kjoa ra 'siaan, kò nga tì'koaá inchinitjasòn-te jè kjotéxoma ra 'an ísikátoya-no. ³Tanga mején-na nga nda katasijin-no, nga nga'tsì xítà 'xìn, jé Cristo tjína ítjòn-la nga jè ma skò, kò jè chjoón, jé xítà 'xìn tjína ítjòn-la nga jè ma skò, koni 'sín nga jè Cristo, jé Nainá tjína-la nga jè ma skò. ⁴Tsa jngo xítà 'xìn bíjtsa skò 'kia nga chja'ta-la Nainá kò tsa 'kia 'bénajmíya 'én-la Nainá, mì kì tíbexkón-jìn jè Cristo ra jè tjína koni skò. ⁵Tanga tsa jngo chjoón ra mì kì bíjtsa skò 'kia nga chja'ta-la Nainá kò tsa 'kia nga 'bénajmíya 'én-la Nainá, mì kì tíbexkón-jìn jè 'xìn-la ra skò tjína; nga 'koaá 'sín jngoya-la koni tsa isijno ska-la tsja skò. ⁶Nga tsa jè chjoón mì kì bíjtsa jè skò, katabíjno ska jnchro; tanga tsa masobá-la nga bate tsja-sko nga sijno ska-la, isaá nda-ni nga katabíjtsa jnchro jè skò. ⁷Jè ra xítà 'xìn mì kì tì'nde-la nga kiijtsa jè skò, nga xkósòn-la Nainá-ní, kò yaá a'ta 'tse xítà 'xìn 'ya-la kjoajeya-la Nainá; tanga yaá a'ta 'tse chjoón nga 'ya-la kjoajeya-la 'xìn-la. ⁸Nga jè ra xítà 'xìn, mì tsa ya ítjo'ta-ni a'ta 'tse chjoón, jé chjoón ra ya ítjo'ta-ni a'ta 'tse xítà 'xìn. ⁹Kò mì tsa jè ngatjì-la chjoón nga isinda jè xítà 'xìn, jé ngatjì-la xítà 'xìn nga isinda jè chjoón. ¹⁰'Koaá ma-ni jñà íchjín tjínè-la nga kiijtsa skò, mé-ni nga jcha-la jè kjotéxoma ra tjín-la, mé-ni nga ske jñà ìkjali. ¹¹Tanga ra a'ta 'tse Na'ín-ná, tsa tsìn jè xítà 'xìn, tì'koaá tsìn jè chjoón; kò tsa tsìn jè chjoón, tì'koaá tsìn jè xítà 'xìn. ¹²Koni 'sín jè chjoón ra tsikínda ítjòn Nainá, yaá ítjokà'ta-ni a'ta 'tse xítà 'xìn, kò tì'koaá jè xítà 'xìn yaá tsìn-ni a'ta 'tse chjoón; tanga ta nga'tsiòò, a'ta 'tse Nainá nchrabá-ni.

¹³Ndaá tìkí́tsjen jiòn, ¿a ndaá tjín tsa jñà íchjín mì kì tjíjtsa skò 'kia nga kichja'ta-la Nainá? ¹⁴¿A mí tsa xá kò'sín ki'chá-ná nga kjosabà-ní tsa jngo xítà 'xìn sìindajò tsjaskò? ¹⁵Tanga jñà íchjín, kíí kò'sín ki'tsì-la nga síndajò tsjaskò nga isaá nda batsíjen, nga jè tsjaskò ma-ni koni tsa jè níkje xo'ba ra bíjtsa skò. ¹⁶Tsa yá ra mejèn-la nga kj'íí 'sín kítso ra a'ta 'tse kjoa kii,

ko'sín nda katasijin-la, mì tsa kj'ií 'sín nga-isa-najin ra jin ko nga'tsì jñà ra naxindá-la Nainá ma.

**Kó'sín nga nda kjón-ní 'sieén 'kia nga síkítsjen-yeé
a'ta 'tse kó'sín nga tsakjèn-ko xita-la Cristo**

¹⁷Tanga jñà 'én ra fi-isa ra koxin-no, mì kì ma nda síkítsajna-no, ta ngatjì-la 'kia nga maxkóya jìòn, mì tsa mé kjonda ra sakó-no, ta isaá jnchro kjoa'cho sakó-no. ¹⁸Jè ra ma'tsia-ni ra koxín-no, 'koaá 'sín iska'ta-na 'én, nga 'kia-ró nga maxkóya jìòn ra naxindá-la Cristo 'mì-no, tjiòn-ró nijòya-no ijo-no; mejèn tsa makjiín-na tsa 'koaá 'sín inchi'nià kitiodò. ¹⁹'Koaà-la 'sín koma ko 'sa-najìòn mé-ni nga jcha-la yá kjòn-ni ra kixi kjoa nga xita-la Cristo ma. ²⁰Ta ngatjì-la 'kia nga maxkóya jìòn, mì tsa ngi ko'sín bichi kiti jìòn koni 'sín nga kitsjà kjokixi jè Na'ín-ná nga síkítsjen-yeé ra a'ta 'tse kjoabiya-la. ²¹Nga tjín i'ka ra tsò ra ská-la bakjèn nga majìn-la tsjá-la xákjín jè niño-la, ko skanda ma'chi-ní; ko jñà ra i'ka, imaa ajò-la ta ngatjì-la nga mì kì bako-la niño. ²²¿A tsín-no ni'ya nándà nga ma 'yò ko bichiodò? ¿Mé-ni nga ko 'sín 'nià-no nga nachrjengi-najìòn ra xita naxindá-la Nainá? Ko ti'koaá nisobá-la jñà ndí xita ra tsín-la ra bakjèn. ¿Kó xián ra 'an? ¿A maá nda síkítsajna-najìòn ra a'ta 'tse kjoa kii? Majìn, mì kì ma nda síkítsajna-no.

²³Nga a'ta 'tseé Na'ín-ná nga kjomà-na koni 'sín tjín kjoa ra ísikátoya-najìòn: Nga jè nitjen 'kia nga tikjè mangatsja xita kondra-la jè Na'ín-ná, iskábé jè niño nchrajín, ²⁴kiichja



nga kitsjà-là kjonda Nainá, isìjòya jè niño nchrajín kò akjòn kitsò: Jè niño nchrajín rakì, jè-ní ra ijo-na ra títsja ra ta ngatjì tsajìon; kò'sín tìjòya-te jìon niño nchrajín nga tikítsjen-yá ra a'ta tsá'an. ²⁵ 'Koaá tì'sín ki'sín 'kia nga ijye tsakjèn; iskábè jè chitsín, nga kitsò: Jè nandá xán 'tse uva ra tjíya chitsín rakì, jè jní-na ra xaájten nga sindajín xitse jngo kjoa ra a'ta tsajìon kò Nainá. 'Koaá 'sín 'tiaàn ki'ta nga tikítsjen-yá ra a'ta tsá'an 'kia nga india-india 'siò. ²⁶ 'Koaá ma-ni, 'kia nga india-india chjinee jìon jè niño nchrajín rakì, kò 'siòya jìon nandá xán 'tse uva jè chitsín rakì, jè kjoabiya-là Na'ín-ná 'benajmíya jìon, skanda 'kia nga kj'íí india-ni ra jè.

**Kó'sín tjínè-là nga nda kjón-ní sikítsjen-yé
'kia nga tsakjèn-kò xita-là Jesús**

²⁷ 'Koaá ma-ni tsa yá ra ta kò'sín skine jè niño nchrajín rakì, kò sk'í jè nandá ra tjíya chitsín 'tse Na'ín-ná, tsa mì kì bexkón-ni kjoa kù, jé tíbátsji-là ijo-la, nga tìbachrjengi-ní koni 'sín nga 'ken Jesús nga kitsjà ijo-la kò nga tsikíxten jní-la. ²⁸ Kíí machjeén-ni nga nda kjón-ní tìchijajin-là inìma-no 'kia nga tikje chjinee jè niño nchrajín kò 'siò jè nandá xán 'tse uva ra tjíya chitsín 'tse Na'ín-ná. ²⁹ Jè ra bakjèn, kò 'bi, tsa mì kì tìbebxkón-ni kjohi'in ra kjomà'tin ijo-la Na'ín-ná, tìjé tìbínè-là kjohi'in ijo-la 'kia nga bakjèn kò 'bi. ³⁰ 'Koaá ma-ni nga kò'sín 'nó kjìn ma-ni ra ya títsajnajin-najìon ra 'nó kiya kò ra inchife nga'nó-la, skanda tjín i'ka ra ijye 'ken. ³¹ Tsa jién-la ra nda kjòn sìchiya ítjòn-lá jè inìma-ná kó'sín titsajneé, mí-la tsa kotjín kjohi'in tsjá-ná Na'ín-ná. ³² Tanga tsa jè Na'ín-ná tsjá-ná kjohi'in, kíí-ní nga mejèn-là nga sìkixiya-ná mé-ni nga mì ya taña sìkjieén kjohi'in ra mì fehe'ta ra kòkò-la jñà xita isà'nde ra mì kì bexkón Nainá.

³³ 'Koaá ma-ni jìon ndí 'ndsé, 'kia nga kítsajnajtín jìon nga kichioè ra a'ta 'tse Na'ín-ná, jchíña-la xàngioo nga jngó jngó-no. ³⁴ Tsa yá ra 'nó ajò-la, ya katakjèn kjòn ya ni'ya-la, mé-ni nga mì kì kjohi'in tsjá-no Nainá tsa 'kia nga mì kì nda 'siaan 'kia nga koxkóya. A'ta 'tse kjoa ra kj'íí-isa, 'kia kjòn nda sikíxiya-no 'kia nga kijchòjkon-no.

Kó ta 'sín t́jín kjoachjine ra tsjá-ná Nainá ra ma sixá'ta-lá

12 ¹Jiòn ndí 'ndsé kò ndí tichjeé, mején-na nga nda katasijin-najiòn kó'sín t́jín ra a'ta 'tse kjoachjine ra tsjá Inìma Tsje-la Nainá mé xá ra 'sieén ra a'ta 'tse. ²Ndaá t́jín-najiòn, 'kia nga tikje ya makjiín-no ra a'ta 'tse Nainá, yaá tsangì'ta-la jiòn nga xìn ndiyá kùkò-no jñà xkòsòn ra mì kì ma-la chja ra nainá tsò-la xita. ³Koaá ma-ni nga kò'sín katasijin-no, nijngo ra ma kítso: “¡Taxki katama'tin Jesús!” tsa a'ta 'tse Inìma Tsje-la Nainá tichja-ni. Kò ti'koaá tsa mì a'ta 'tse Inìma Tsje-la Nainá tichja-ni, mì kì yá ra ma kítso: “Jè Jesús ra t́jna ítjòn-ná.”

**Kó'sín nga ḱjín ndiyá t́jín-nì kjoachjine
ra tsjá-ná Nainá ra ma sixá'ta-lá**

⁴Ya naxindá-la Nainá, ḱjín ndiyá t́jín-ni jñà kjoachjine ra tjábé-la mé-ni nga ḱjín ndiyá xá ra ma 'siin-ni, tanga tijé-ni Inìma Tsje-la Nainá ra tsjá nga'tsi kjoachjine kù. ⁵Kjín ndiyá-la kó'sín nga níxá'tá-lá Nainá, tanga tijé-ni Na'ín-ná ra ma jè ni-la xá. ⁶Kò ḱjín ndiyá-la kó'sín nga 'sín jè xita ra nga'ño-la Nainá tísíxájin ya inìma-la, tanga tijé-ni Nainá ra síxájin ya inìma-la nga'tsi xita ra 'sín nga'tsi kjoa kù. ⁷Nga jngó jngó xita, tjábé-la jngo kjoachjine ra bakón jè Inìma Tsje-la Nainá, mé-ni nga katasakó-ni kjonda a'ta 'tse nga'tsi xita naxindá-la Nainá. ⁸Tjín i'ka xita ra a'ta 'tse Inìma Tsje-la Nainá 'bì-la nga ma-la katachja 'én ra 'ño chjine t́jín, kò t́jín i'ka ra 'bì-la nga katachja koni 'sín t́jín kjobítsjen ra tjí'ma-la Nainá, tanga tijé-ni Inìma Tsje-la Nainá ra tsjá-la kjoachjine. ⁹Tjín ra kò'sín 'bì-la nga nda katabá'ta ikon Nainá, ti'koaá tijé-ni Inìma Tsje-la Nainá ra tsjá-la nga kò'sín 'sín; kò t́jín ra kò'sín 'bì-la nga ma-la katasínda-ni xita ra kiya, tanga tijé-ni Inìma Tsje-la Nainá ra kò'sín tsjá-la. ¹⁰Tjín ra kò'sín 'bì-la nga ma-la 'sín kjoaxkón ra nda t́jín, kò t́jín ra kò'sín 'bì-la nga ma-la chja ngajo-la Nainá. Tjín ra kò'sín 'bì-la nga nda machiyajin-la yá 'tse nga'ño ra síchjeén nga jngó jngó xita ra 'bénajmíya. ¿A 'tseé Inìma Tsje-la Nainá o ra majìn-ní? Kò t́jín ra kò'sín 'bì-la nga ma-la chja 'én ra ta jè fiya-la, kò t́jín ra ma-la síkatoya-ni kó'sín tsò-ni jñà 'én kù. ¹¹Tanga tijé-ni Inìma Tsje-la Nainá ra ta jè ta jngo-ni ra ma-la kò'sín 'sín nga'tsi kjoa kù nga

síka'bí-la nga jngó jngó xita ñáa kjoachjine ra jè mejèn-la nga tsjá-la.

¹² Ta jngo ma-ni ijo-ná, tanga kjín ndiyá-la mé ra chja'nda; tanga ni'sín ko'sín kjìn ndiyá tjín-ni mé ra chja'nda, ta jngoó ma-ni ta nga'tsiòo; 'koaá ti'sín tjín ra a'ta 'tse naxindá-la Cristo. ¹³ Nga tijé-ni Inìma Tsje-la Nainá ra tjínajin inìma-ná 'kia nga isatíndé nga'tsí-ná, mé-ni nga ta jngoó ijo koma-ná, ni'sín ta yá xita-ni; a xita judío-ní o ra mí tsa xita judío; a xita chi'nda-ní o ra mí tsa xita chi'nda. Nga jngoó ndiyá-la Inìma Tsje-la Nainá ra kitsjá-ná.

¹⁴ Jè ijo-ná mì tsa ta jngo tjín-ni kó'sín nga 'ki; kjín ndiyá tjín-ni mé ra ta chja'nda. ¹⁵ Tsa jè ndsaké kitso: “¿Mé-ni mì tsa tsja xita kjomà-na ra 'an? Mì-la tsa ya chjà-naa ya a'ta 'tse ijo.” Ni'sín ko'sín kitso mì kì koma tjáhixìn, nga ta jngoó ijo tjín-ni. ¹⁶ Ko tsa jè chíká-ná kitso: “¿Mé-ni mì tsa xkon xita kjomà-na ra 'an? Mì-la tsa ya chjà-na ya a'ta 'tse ijo.” Ni'sín ko'sín kitso mì kì koma tjáhixìn, nga ta jngoó ijo tjín-ni. ¹⁷ Jè ijo-ná tsa ngi ta xkén koma tjingo, ¿ñánda sijna jè chíká-ná mé-ni nga koma kináyá-ná? Ko tsa jè ijo-ná, ngi ta chíká-ná koma tjingo, ¿ñánda sijna nitjén ra koma chjón-jtá-né? ¹⁸ Tanga jè Nainá, yaá isíki'hijyo i'nde-la ñánda nga nda isasèn-la ra jè, nga jngó jngó skoya-la ijo-ná. ¹⁹ Tsa ta jngo skoya tjín-ni ijo-ná, mí-la tsa ngi ijo tjingo-jìn. ²⁰ Kixí kjoa ni'sín kjìn skoya tjín-ni ijo-ná, tanga ta jngoó ijo ma-ni.

²¹ Jè xkén mì kì ma kitso-la jè ndseé: “Mì kì machjeén-na ra ji.” Ti'koaá jè ské, mì kì koma tsa kitso-la jñà ndsaké: “Mì tsa mé machjeén jion ra a'ta tsa'an.” ²² Jñà jnchro isa 'ñó machjeén ra chja'nda ijo-ná jñà ra ko'sín tsijen koni tsa mí mé nga'ño tjín-la. ²³ A'ta 'tse ijo-ná, jñà ra ko'sín ma-ná nga mì tsa 'ñó 'yaxkén, ta isaá jnchro, jñà jnchro isa 'ñó nda níkáyeé nikje mé-ni nga isa nda kata'yaxkón-la. Bijtsa'ma-né jè ijo-ná, jñà ra ko'sín ma-ná nga mì kì tjí'nde nga jcha-la, ²⁴ ko jñà ra nda tsijen-ni, mì kì machjeén-la nga sijtsa'ma. Jè Nainá, 'koaá 'sín tsikínda ijo-ná nga isa 'ñó nda kata'yaxkón jñà ra ko'sín ma-ná nga isa chiba chjí-la, ²⁵ mé-ni nga jngó jngó skoya ijo-ná nda kjón katatsabaya xákjín, ko katatsjá nga'ño kañá-la xákjín nga'tsiòo. ²⁶ Tsa 'kia ñánda nga mahajò ijo-ná, ta mahajò tjingo-ní. Ko tsa 'kia ñánda nga tí'yaxkón, ndaá 'se ijye-la nga tjingo ijo.

²⁷Jìon, 'koáá 'sín jngoya-la koni tsa ijo-la Cristo ma jìon, nga kja tjín kja tjín-no xá ra a'ta 'tse Cristo. ²⁸Nainá, 'koáá 'sín iskosòn-la mé xá ra 'siin xitá: jè ra ma'tsia kjòn-ni isíkítsajna ya ajin naxindá-la, xitá ra jè bixáya-la nga síka'bísòn 'én-la; ra ijchò jò-ni isíkítsajna jñà xitá ra ma-la chja ngajo-la, kò ra ijchò jàn-ni isíkítsajna jñà ra nda ma-la kokòn-ya 'én-la, kò ti'koáá isíkítsajna jñà ra ma-la 'siin kjoxxkón, akjòn isíkítsajna-te jñà ra ma-la siinda-ni xitá ra kiya, kò jñà ra ma-la kosiko'ta xitá xákjén, kò jñà ra ma-la kítsajna ítjòn-la xitá naxindá-la, kò jñà ra kj'íí 'én chja ra mì yá xitá ma-la kótsò-ni. ²⁹Mì tsa ta nga'tsi-ni nga bixáya-la Nainá nga síka'bísòn 'én-la; kò mì tsa ta nga'tsi-ni nga kò'sín 'bì-la nga ma-la chja ngajo-la Nainá. Kò nì mì tsa ta nga'tsi-ni nga kò'sín 'bì-la nga 'ñó nda ma-la bakón-ya 'én-la Nainá; kò mì tsa ta nga'tsi-ni nga kò'sín 'bì-la nga ma-la 'sín kjoxxkón ra 'tse Nainá; ³⁰ti'koáá mì tsa ta nga'tsi-ni nga kò'sín 'bì-la nga ma-la sínda-ni xitá ra kiya. Kò ti'koáá mì tsa ta nga'tsi-ni nga kò'sín 'bì-la nga ma-la chja 'én ra ta jè fiya-la; kò nì mì tsa ta nga'tsi-ni nga kò'sín 'bì-la nga ma-la síkatoya jñà 'én kii. ³¹Jè tjatsji jìon jè kjoachjine-la Nainá ra isa nda tjín.

Tanga tjín jngo ndiyá ra 'an kokon-no ra isa 'ñó nda tjín.

Kó'sín tjín kjòn-ni ra a'ta 'tse kjoatsjacha

13 ¹Tsa kjin ndiyá tjín-ni 'én ra chjàa ra ta 'an fiya-na, kò tsa skanda ma-na chjàa 'én ra chja jñà ikjali, tanga tsa mí tsjake-naa xitá ra kj'íí, mí-la tsa mé chjí-la jñà 'én ra chjàa; 'koàa-la 'sín 'ki-na koni tsa jngo kichá ra faháya-la, kò koni jngo chrobá ra tsján fane. ²Tsa maá-na nga nda chja ngajo-la Nainá kò tsa ndaá fiya ijye-na kó'sín tjín nga'tsi kjoa ra jè Nainá tjí'ma-la, tsa 'ñó tjín-na ra 'mì kjoachjine, kò tsa ti'koáá 'ñó nda makjiín-na a'ta 'tse Nainá nga skanda maá-na sijtíya-la jñà nindo; tanga tsa mì tsjake-naa xitá ra kj'íí, nì ta mé-la chjí-ina. ³Tsa maá-na tsja ijye nga'tsi tsajmì ra tjín-na nga katakjèn jñà ra xitá ima, kò tsa skanda tsja-náa ijo-na nga katati ya ajin ni'í, tanga tsa mì tsjake-naa jñà xitá ra kj'íí, takò nímé ra sikíjne.

⁴Jè ra tsjake xitá ra kj'íí, maá-la koñákjoa; 'ñó nda xitá 'sín; mì tsa maxitakòn-jìn; mì tsa jè nda síkíjna ijo-la; kò mì tsa 'nga fiko kjobítsjen-la; ⁵mì tsa ta 'sín ta ma-jìn; mì tsa ta

kjɔnda 'tse bátsji; mì tsa sasa majti-la kɔ̀ mì tsa ya bíjin takòn ki'ta mé kjoa ra ma'tin; ⁶tì'koaá mì tsa matsajjin-la 'kia nga mé kjoa'cho ra 'sín xita; tanga jè, tsjaá 'se-la a'ta 'tse kjoakixi ra 'sín xita; ⁷Jngo xita ra tsjake jñà xita ra kj'íí, mì tsa jè fi-ni mé kjoa ra tjín-la xita, mì tsa chiba tjín-la kó'ki nga makjín-la, kó'ki nga skoóna kjoa kɔ̀ kó'ki nga chíkjoajin-la ta mé kjoa-ni.

⁸Jngo xita ra tsjake jñà xita ra kj'íí, 'koaá 'sín 'ki koma ki'ta. Tanga kijchó nichjin nga mì tì yá ra 'se-ni ra kichja ngajo-la Nainá, nga mì tì yá ra kichja-ni 'én ra kj'íí tsò, tì'koaá mì tì yá ra tjábé-la kjobítsjen ra tjí'ma-la Nainá. ⁹Ta ngatjì-la, kjè tsa nda 'ya ijyeé kjobítsjen ra tjí'ma-la Nainá, kɔ̀ kjè kì tsa nda nakjoá ngajo-lá Nainá koni 'ki tjínè-la nga kinákjeé. ¹⁰Tanga 'kia nga kijchò nichjin nga kitjasòn kjobítsjen-la Nainá nga ni-tì-mé jchija'ta-la, yaá kjehe'tà jè ra ta chiba machiya-ná 'ndi-ni.

¹¹'Kia nga tì'sa itsé-na, 'koaá 'sín chjàa kɔ̀ 'koaá 'sín síkítsjen, tì'koaá 'koaá 'sín machiya-na koni tsa jngo ndí ti itsé; tanga 'kia nga ijye kjójchíngaa kítsjin-náa nga'tsi ra kjoa 'tse ixti.

¹²'Ndi-ni, ta 'koaá 'sín tsijen-ná Nainá koni tsa 'kia nga chí'sén jngeé chitsín ra ijye tímaxa. Tanga kijchò nichjin nga nda kjón jchí'én Nainá. 'Ndi 'ndi, ta chibaá tjín-ni koni 'sín nga fiya-na, tanga tíjna jngo nichjin nga ske kjòon kó'sín nga jè Nainá tsijen-la ra a'ta tsa'an.

¹³'Ndi 'ndi, ján tjín-ni kjoa ra tjítsajna ki'ta: Jè kjoa nga makjín-ná a'ta 'tse Nainá, jè kjoa nga tjíjngo takén nga chiná-lá jè kjonda ra tsjá-ná Nainá, kɔ̀ jè, kó'sín nga tsjacheé xita ra kj'íí. Tanga jè ra tíjna ítjòn kjòn-ni, jé-ní kó'sín nga tsjacheé xita ra kj'íí.

Kó'sín tjín a'ta 'tse jngo 'én ra mì kì yá fiya-la kótsò-ni

14 ¹Kó'sín jè isa 'ñó nda tangí'ta-la jè ra 'mì kjotsjacha; tanga tì'koaá 'ñó tjatsji-te jñà kjoachjine ra tsjá jè Inima Tsje-la Nainá. Kɔ̀ jè ra isa 'ñó chjí-la, jé-ní nga kinákjoa ngajo-lá Nainá. ²Jè ra kj'íí 'én chja ra mì yá xita ma-la kótsò-ni, mì tsa taxki xita-jìn ra tíchja-la, jé sabá Nainá ra tíchja'ta-la. Nga mì kì yá ra machiya-la 'én ra chja, ta ngatjì-la, a'ta 'tse Inima Tsje-la Nainá nga tíchja'ma. ³Tanga jñà xita ra Nainá chja ngajo-la, jñá chja-la xita, mé-ni isa nda katafiya-la ra a'ta 'tse Nainá, kɔ̀ nga

kata'ñó-isa ikon, tì'koa sije ikon nga'tsiò. ⁴Jè ra kj'íí 'én chja ra mì yá xita ma-la kótsò-ni, ta jé sakó-la nga'ño; tanga jè ra chja ngajo-la Nainá, 'kia nga 'bénajmíya, jñà xita naxindá-la Nainá sakó-la nga'ño. ⁵Mején-na tsa nga'tsi-najìon ma-no kinákjoa ra kj'íí 'én. Tanga isaá-la ta nda-ni tsa jè Nainá kinákjoa ngajo-la. Nga isaá 'ño chjí-la jè ra Nainá chja ngajo-la, nda mí 'koa-ni koni jè ra kj'íí 'én chja, ra mì yá xita ma-la kótsò-ni. Kja ta jngó-la tsa tjín xita ra ma-la siikatoya kótsò-ni 'én rakii, mé-ni isa nda sakò-isa-la nga'ño xita naxindá-la Nainá.

⁶Jìon 'ndsé ko tichjeé, 'koaá 'sín jngoya-la, tsa 'kia 'an ra kijchò'tsè-najìon, tsa ta kj'íí 'én kichjà-najìon jè ra mì kì kochiya-no, ¿mé kjonda ra sakò-najìon, tsa mì tsa jè kichjà-najìon jè 'én ra Nainá síchiya-na, ko jè kjobítsjen ra tsjá Nainá, ko jñà 'én ra 'an chjà ngajo-la Nainá nga bakon-yá-najìon? ⁷Skanda jñà tsajmì-la xita ra síkjane, ¿kó'sín jcha-la náa-ni ra tífane, tsa mì kja kj'íí kja kj'íí kitso jta-la nga jngó jngóo, koni tsa jè chrjoo ko jè ní'ño? ⁸'Koaá jngoya-la jè chrjoo ra 'tse xita kjojchán, tsa mì kì nda ski'nda, ¿kó'sín ma-ni nga kitsajnanda nga kii'tsia kjojchán? ⁹'Koaá tì'sín ma ra a'ta tsajìon, tsa mì kì jñà kinákjoa jìon 'én ra nda fiya-ná, ¿kó'sín ma jcha-la mé 'én-ni ra inchinakjoá jìon? Tsa mì kì yá ra kiya-la kótsò-ni, koni tsò-ni kjoa, ta isén-la inchinakjoá-jin jìon. ¹⁰Kixíí kjoa taxki kjín-la ndiyá-la 'én ra tjín ta nga tíjngo ya isà'nde, tanga chjaá-ni kó'sín tsò nga jngó jngó skoya 'én. ¹¹Tsa mì kì fiya-na ra 'an kó'sín tsò-ni 'én ra tíchja jngo xita, 'koaá 'sín koma-na nga jè xita rakii, xín i'nde-la. Ko tì'koaá ra jè, 'koaá 'sín koma-la nga xín i'ndeé tsa'an, ta ngatjì-la nga mì kì kji'nchré jñà 'én ra chjàa ra 'an.

¹²Ra jìon, ta jé 'ño fatsjio jñà kjoachjine ra tsjá jè Inìma Tsje-la Nainá, tanga isaá nda-ni nga jè isa 'ño tjatsjio jè kjoachjine ra koma kosiko'ta jñà xita naxindá-la Nainá nga isa nda 'se-isa-la nga'ño. ¹³'Koaá ma-ni, jè xita ra kj'íí tsò 'én ra chja, katasíjé'ta-la Nainá mé-ni nga 'se-la nga'ño nga ma 'keènajmíya kótsò-ni jè 'én ra chja. ¹⁴'An, 'kia nga chjà'tà-la Nainá tsa kj'íí tsò 'én ra tíchjàa, jè ra nì mì 'an fiya-na, tà jè inìma-na ra tíchja, tanga jè kjobítsjen-na, mì kì mé nga'ño sakò-la. ¹⁵Tanga, ¿mé ra 'siaan tsa 'koa? Jé-la ra machjeén, 'kia nga kitsá'ba-la Nainá, 'koaá 'sín kichjà'ta-la koni 'sín

jè Inìma Tsje-la Nainá síchiya-la inìma-na, tanga koó jngo 'én ra ti'koaá 'an fiya-na. Tsa 'kia nga see ra a'ta 'tse, 'koaá 'sín see koni 'sín jè Inìma Tsje-la Nainá síchiya-na, tanga jngoó so ra ti'koaá 'an fiya-na. ¹⁶'Kia nga kinákjoa'ta-la Nainá koni 'sín nga síchiya-li jè Inìma Tsje-la, tsa ta jñá 'én kinákjii ra mì yá xita machiya-la, çkó'sín koma-ni kitso xita ra ká'nchré-li: “Ko'sín katama koni 'sín nga kasi”, tsa mì kì kàfiya-la jè 'én ra kanakjí? ¹⁷Kixíí-la kjoa, ndaá-la tjín koni 'sín nga 'bì-la jì kjonda Nainá, tanga nimé nga'nó sakò-la jñà ra ká'nchré-li, nga mì kì kàfiya-la koni 'sín nga kasi. ¹⁸'An, tsjaá-la kjonda Nainá nga isaá nda ma-na chjà 'én ra mì kì tsa yá xita fiya-la; tanga ra jìòn, mì tsa ko'sín nda nakjoá jìòn. ¹⁹Tanga ya ajin naxindá-la Nainá, isaá-la nda-ni tsa tà 'òn 'én kichjà-la ra kjobítsjen tjiko, mé-ni nga ma 'kenájmíya-la ra kj'íí xita ko mì 'koa-ni tsa te jmi 'én kichjàa ra kj'íí tsò ra mì yá kya-la.

²⁰Jìòn 'ndsé ko tichjeé, kì ko'sín níkítsjen koni tsa ixti. Tanga ra a'ta 'tse kjoa'cho, ko'sín 'tiaàn koni jñà ixti ra kjè kì fiya-la. Tanga ra a'ta 'tse kjobítsjen-no, tjaya jchá-la takòn. ²¹'Koaá 'sín tíchja xajon ra tjí'ta 'én-la Nainá nga tsò: “'Aán sikásén-la xita ra xìn nangi ko ra kj'íí 'én chja, nga kichjà-la naxindá-na; takó mì kì kj'i'nchré-na, nì'sín ko'sín sikóo, tsó Na'ín-ná.” ²²'Kia nga nakjé 'én ra mì yá xita machiya-la, jngoó kjoxkón tíbakón-la Nainá jñà xita ra mì kì makjiín-la, mì tsa jñà-jìn xita ra ijye makjiín-la. Tanga 'kia nga nakjoá ngajo-lá Nainá, jñà tínakjoá-la xita ra ijye makjiín-la mì tsa jñà-jìn ra kjè kì makjiín-la. ²³Tsa 'kia nga koxxóya naxindá-la Nainá, tsa kj'íí tsò 'én kichja nga'tsiòo ra mì kì yá xita machiya-la, ko tsa 'kia chiba-la kjoaha'sen jngo xita ra kjè tsa ya bijchó ra mì kì makjiín-la 'én-la Nainá, ça mí tsa kitso: “Skáa-la jñà xita kì?” ²⁴Tanga tsa nga'tsi-no, jè Nainá inchinakjoá ngajo-la, ko tsa 'kia chiba-la kjoaha'sen jngo xita ra kjè kì tsa ya bijchó ra mì kì makjiín-la 'én-la Nainá, tsa kj'i'nchré-no koni 'sín nga inchinakjoá ngajo-la Nainá, kokjiín-la ko ti'koaá kochiyaá-la nga xita jé-ní. ²⁵Yaá jcha-la nga'tsi kjoa'cho ra tjjin inìma-la ko kosen-xkó'nchi-ní nga kosen-niñanè isén-la ya a'ta nángi nga skexkón Nainá ko 'koaá 'sín kitso nga kixíí kjoa nga yaá tjnain kiti-no Nainá.

**Kó'sín machjeén nga 'sieén ra a'ta 'tse Nainá
ya ñánda nga koxkóyéé**

²⁶ Jìon 'ndsé kò tichjeé, ¿kó tsò-ni kjoa kii? Tsò-ni, 'kia nga koxkóya jìon nga jeya sikhjna Nainá, jngó jngó-no tingatsja kjotjò-no Nainá; jngo ra katase, jngo ra katabakón-ya, jngo ra kata'bénajmí kó'sín nga Nainá tísichiya-la, kò jngo ra kj'íí 'én katachja ra mì yá xita machiya-la, kò jngo katasíkatoya-ni 'én rakii. Kò'sín 'tiaàn nga jngó jngó-no mé-ni isa tse nga'ño kata'se-isa-no, jìon ra naxindá-la Nainá 'mì-no. ²⁷Tsa 'kia nga mejèn-no kinákjoa 'én ra kj'íí tsò ra mì yá xita machiya-la, machjeén-ní tsa ta jò, kò tsa ta jàn xita katachja; tanga jngó jngó katachja; kò jngo ra katasíkatoya-ni kó'sín tsò-ni 'én kii. ²⁸Tsa tsin ra ma-la síkatoya-ni 'én kii, tà jyò katitsahijyo jnchro ya ajin naxindá-la Nainá; ta yaá ajin inima-la katabáko Nainá. ²⁹'Koaá tì'sín tjin a'ta 'tse xita ra chja ngajo-la Nainá; tsa jò kò tsa jàn ma-ni, tjiné-la nga jngó jngó kichja mé-ni nga jña xita ra i'ka ra kji'nchré, jña-ní ra kitso-ni a ndaá tjin o ra majin-ní. ³⁰Tsa kitjotin jngo ra ya títajna nga kitso: “Jngo 'én tísichiya-na Nainá”, machjeén-ní nga jè ra tichja ítjòn katatsjá'nde-la nga katachja mé 'én ra tísichiya-la Nainá. ³¹'Koaá 'sín koma nga nga'tsi ra ma-no nakjoá ngajo-la Nainá, nga komaá jngó jngó 'kénajmíya mé-ni nga isa nda kochiya-isa-no kò sakò-isa-no ra kjotsja. ³²Jña xita ra chja ngajo-la Nainá, jña tjin-la kinda kó'sín nga kichja ngajo-la Nainá. ³³Nga jè Nainá, mì kì sasén-la ñánda tjin kjosi kò ñánda nga ta tjin ta ma kjoa. Yaá sasén-la ñánda nga tjin kjoa'nchán.

Koni 'sín chon tijnjo ñánda nga maxkóya xita-la Nainá, ³⁴machjeén-ní nga jña íchjín jyò katitsajna 'kia nga tímaxkiya 'én-la Nainá, nga mì kì tji'nde-la nga ma kichja; koni 'sín tsò-te jè kjotéxoma, nga jña íchjín tjinè-la nga ta kji'nchré.

³⁵Tsa mé kjoa ra mejèn-la ske, 'kiaá katakjinangi-la 'xin-la 'kia nga kijchò-ni ni'ya-la. Nga mì kì nda tjin nga jngo chjoón ya kichjajin ñánda nga maxkóya naxindá-la Nainá.

³⁶¿A 'koaá 'sín níkijsen jìon, nga a'ta tsajión kjo'tsia-ni 'én-la Nainá? ¿O ra 'koaá ma-no nga ta jìon ki'senajmíya-no? ³⁷Tsa titsahijyo i'ka jìon ra kò'sín síkijsen nga maá-la chja ngajo-la Nainá kò tsa 'koaá 'sín tsò nga jè Inima Tsje-la Nainá kò'sín tísichiya-la, 'koaá 'sín nda katasijin-la nga jña 'én ra kotíxian,

'tseé Na'ín-ná jè kjotéxoma ra tísichjéén. ³⁸Tsa tjín jngo x̄ita ra mì k̄i skexkón 'én ra tíchjàa, t̄i'koaá jè x̄ita rak̄i, mì k̄i jchaxkón.

³⁹Ndí 'ndsé, 'ñó tjatsjio nga kinákjoa ngajo-la Nainá, k̄o k̄i tà chjàn batechjà-la j̄nà ra chjà 'én ra kj'íi tsò, ra mì yá x̄ita f̄iya-là. ⁴⁰Tanga jé ra machjeén nga nda kjón-ní t̄ihitjasòn nga'tsì kjoa k̄i, nga ndiyá ndiyá kjón-ní nga tahíkoo.

Kó ta tjín x̄ita tsakón-là ijo-là Jesús 'kia nga ijye jaáya-là

15 ¹Ndi-ni ndí 'ndsé k̄o ndí tichjeé, mején-na nga síkítsjen-yá-najìon jè 'én x̄itse ra nda tsò a'ta 'tse Cristo ra 'an tsi'kènjmíya-najìon, 'én nda-là Cristo ra kjokjiín-no k̄o ra kixi t̄itsajna-no 'ndi-ni. ²Jè 'én nda rak̄i ra koma-là s̄ikítsajnan̄d̄i-no a'ta 'tse jé-no tsa takó k̄o'sín kixi inchimahíkoo 'én nda-là Cristo koni 'sín nga ítsi'kenajmíya-no; tsa majìn, ta kjotjó-la-ni nga kjokjiín-no.

³Nga jé kjón ítsakon-yá ítjòn-najìon koni 'sín tjín 'én ra 'an itjábé-na, nga jé Cristo 'ken-tji ngajo-ná ra kjoa 'tse jé-ná koni 'sín tíchjà x̄ajon ra tjí'ta 'én-là Nainá; ⁴nga kisihi'nde-ní k̄o nga jaáya-ilà nga ijchò jàn n̄ichjin koni 'sín nga tíchjà x̄ajon ra tjí'ta 'én-là Nainá; ⁵nga jè Cefas [Pedro] tsakón-là ijo-là; ra kjomà 'kiaá tsakón-là ijo-là j̄nà x̄ita-là ra i'ka ra ma-ni tejò k̄o Pedro. ⁶Ra kjomà askan-nioo, tsatoó 'òn sindo ma-ni x̄ita ra ngi india kjón-ní kiskàjin. J̄nà x̄ita k̄i, ijyeé 'ken i'ka tanga takó kjín ma-ni ra takó t̄itsakon skanda n̄ichjin 'ndi-ni. ⁷Kiaá tsakón-là ijo-là jè Jacobo k̄o akjòn tsakón-là ijo-là nga'tsì x̄ita-là ra tsikíxáya-là.

⁸Ra ijyehe'tà-ni, 'aán tsakón-na ijo-là, 'an ra 'koaá jngoya-là koni jngo i'ndí-xó ra mì nda kitsin. ⁹'An, isaá ta 'ñó nangi t̄ijnà koni j̄nà x̄ita ra i'ka ra tsikíxáya-là Jesús. Nda mí-la bakèn-na nga 'an tsikíxáya-na tsa nda kjòn-ni, tà ngatjì-là nga 'aán k̄itsahatjingi-là x̄ita nax̄indá-là Nainá. ¹⁰Tanga ta kjonda 'tse Nainá-ní tsa yá-na ra 'an. K̄o jè kjonda rak̄i mì tsa ta ya tíchija. Isaá ta 'ñó jnchro t̄isíxáa, nda mí 'koa-ni koni j̄nà x̄ita-là ra i'ka. Tanga mì tsa 'an j̄àan, jè sabá kjonda-là Nainá ra t̄isíxájin ijo-na. ¹¹Mì tsa jè ra chjì-là yá ra tsakón-ya, a j̄nà x̄ita ra i'kaa o ra 'an-ná; jè-ní ra chjì-là nga j̄jín tsi'kènjmíya-lajin jè 'én nda-là Cristo k̄o 'ndi-ni ijyeé makjìin-najìon.

Kó'sín t́jín a'ta 'tse kjoa nga kjoaáya-la xita

¹² 'Koaá 'sín tsakòya-lajin nga jè Cristo jaáya-la ya ajin-la mi'ken; tanga, ¿mé-ni ko'sín bixó i'ka-najìon nga mì kì ma kjoaáya-la jñà xita ra ijye 'ken? ¹³ Tsa mì kì kjoaáya-la xita ra ijye 'ken, takó kjè-la tsa faháya-la Cristo tsa'koa. ¹⁴ Tsa mì tsa jaáya-la Cristo, ta kjotjò-la-ni nga inchi'bènajmíya-jin ko tì'koaá ta kjotjò-la-ni nga ko'sín makjiín-najìon tsa'koa. ¹⁵ Tsa kixi kjoa nga mì kì kjoaáya-la xita ra ijye 'ken, jín-lajin ra xita ndiso kítjongi-jin ya a'ta 'tse Nainá, nga 'koaá 'sín tsi'kènajmíya-jin nga jè Nainá isikjaáya-la Cristo, ko mí-la tsa jaáya-la tsa'koa tsa kixi kjoa nga mì kì faháya-la mi'ken. ¹⁶ Tsa mì faháya-la mi'ken tsa'koa, tì'koaá takó kjè-la faháya-la jè Cristo. ¹⁷ Ko tsa kjè faháya-la Cristo, nímé-la chjí-la koni 'sín nga makjiín-najìon tsa'koa; takó yaá-la titsajin-najìon jé-no. ¹⁸ Ko jñà xita ra ijye 'ken ra kjokjiín-la a'ta 'tse Cristo 'kia nga títsajnakon-isa, ta yaá-la ichijà tsa'koa, tsa mì kì jaáya-la jè Cristo. ¹⁹ Jién-leé ra isa ta bato xita ima 'mì-ná i a'ta nangi, tsa 'koaá 'sín bixé nga tà yaá kjehe'tà nga'tsi kjoa ra chiñá-lá a'ta 'tse Cristo 'kia nga jién ra kiyé.

²⁰ Tanga ra ngi kixi kjoa, jè Cristo jaáya-la. 'Koaá 'sín kjomà ra a'ta 'tse koni jngo to ra majchá ítjòn. Jè jaáya ítjòn-la mé-ni nga koma kjoaáya-la askan-nioo jñà xita ra ijye 'ken. ²¹ Koni 'sín ta ngatjia-ni jngo xita, nga ko'sín 'ji kjobiya i isà'nde, 'koaá tì'sín ta ngatji-la jngo xita, nga koma kjoaáya-la jñà ra ijye 'ken. ²² Nga a'ta 'tse Adán-ní koni 'sín nga biya nga'tsi xita. 'Koaá tì'sín ta a'ta 'tse Cristo-ní nga ma kítsakon nga'tsi xita. ²³ Tanga kja kijchò kja kijchò nichjin-la nga koko-la. Jè Cristo jaáya ítjòn-la. Tanga 'kiaá kjoaáya-la jñà xita ra 'tse Cristo, 'kia nga kjí'í india-ni ra jè. ²⁴ 'Kiaá kjehe'tà isà'nde 'kia nga jè Cristo siikjehesòn ijye nga'tsi nga'ño ra mì nda, ko nga'tsi kjotéxoma 'cho, ko ra batéxoma-la nga'tsi ra kjoa'cho. 'Kiaá jè Cristo siingatsja kjotéxoma-la Nainá ra Na'ín-ná ma. ²⁵ Machjeén-ní nga jè Cristo katabatéxoma skanda 'kia nga ya siikítsahijyongí ya ndsako nga'tsi jñà xita kondra-la. ²⁶ Ko jè kondra ra fehe'ta-ni nga jchija, jé ra 'mì kjobiya. ²⁷ Ta mé ra t́jín, Nainá, yaá kisíkítsajnangi ijye ya ndsako Cristo. Jè tíbatéxoma ijye-la. Tanga, mì tsa tsò-ni kjoa nga jè Nainá yaá tíjnangi-te ya ndsako Cristo, nga jè sabá jnchro Nainá ra ya

tsikítsajnangi ya ndsako Cristo ta nga'tsi mé ra tjín. ²⁸ 'Kia nga ijye ya kítsajnangi nga'tsi ra tjín ya angi ndsako Cristo, 'kiaá, ra tijè-ni Cristo, koni ra i'ndí-la ma, yaá kíjnangi ndsako Nainá, jè ra tijè tsikítsajnangi-ni ndsako nga'tsi ra tjín. 'Koaá 'sín jè Nainá kotèxoma-la nga'tsi ra 'se i isà'nde.

²⁹ Tanga tsa mì yá ra faháya-la, ¿mé-ni jñà xita batínda ngajo-la ijo-la jñà xita ra ijye 'ken? ¿Mé-ni ko'sín 'sín-ni, tsa kixi kjoa nga mì kì faháya-la jñà ra ijye 'ken? ³⁰ Ko ngajin, ¿mé-ni chjàn nichjin nchijón inchibinchaxkón-lajin ijo-najin tsa'koa [nga inchi'bènajmíya-jin 'én nda-la Cristo], tsa mì yá ra kjoaáya-ila? ³¹ Tsa 'yaá-la jìon 'ndsé ko tichjeé, nga nichjin nchijón-ní nga tjen-nda-na kjobiya ra 'an, ngi kixi kiti-ní, jñà kjoa kii koni 'sín tsja tjín-te-na ra a'ta tsajìon, tà ngatjì-la nga ngàsòn makjiín-ná a'ta 'tse Cristo Jesús ra tíjna ítjòn-ná. ³² 'Kia nga ískajàn-ko xita ra koni kjòn cho ijñà kjòn ya ján naxínda Éfeso, nímé-la ra ísikíjneè-na tsa'koa, tsa tà kjoa 'tse xita isà'ndeé-ni ra ískajàn'ta. Tsa mí faháya-la jñà ra ijye 'ken, ko'sín 'sian jnchreé tsa'koa koni 'sín nga tsò i'ka xita: “Kichieé, ko 'sieé nga takó kiyá kosaá-né nchijòn.” ³³ Kì tijìon bindisoko-no ijo-no. Ndaá tsò jngo 'én ra tsò: “Jñà xita ra ya fahijtaceé ra mì kì nda tjín kjobítsjen-la, sa'koaá ta jñà jnchro síkítsón-jin-ni koni 'sín nga nda inchiníjché ijo-ná.” ³⁴ Tìkínda ki'ta ijo-no. Kì tì tsja jé fatsji-no. Nga tjín i'ka ra mì kì bexkon Nainá. Kíí koxin-no jìon mé-ni nga katasabà-no.

Kó'sín kjoaáya-la xita ra ijye 'ken

³⁵ Tjín-la i'ka jìon ra bixó: “¿Kó'sín koma-la nga kjoaáya-ila mi'ken? ¿Mé ijo 'ya 'kia nga kjoaáya-ila?” ³⁶ ¿Mé-ni ta mì machiya-no! 'Koaá jngoya-la koni jñà ra bitje jìon, mì kì kiso tsa mì kì ítjòn kjì'ndo chrjaba-la. ³⁷ Nga jñà nijmé ra bitje jìon, mì tsa kòkjòn-jìn koni kjòn koma jñà jno 'kia nga ijye kiso, ni'sín ta mé nijmé-nioo, a 'tse trigo-ní o ra kj'íí nijmé-ní. ³⁸ Nga jè Nainá, 'koaá 'sín kjòn 'sijn jno koni 'sín nga jè mejèn-la. 'Kia nga jngó jngó skoya tsajmì sitje, jè Nainá, 'koaá 'sín kjòn 'sín xka-la koni 'sín kjòn nándà nga inchrabà tje-ni. ³⁹ Mì tsa ta nga'tsi-ni ijo ngàsòn kjòn. Jién ra xita 'mì-ná, kj'íí kjòn ijo-ná, ko kj'íí kjòn ijo-la cho; kj'íí kjòn ijo-la ti, ko kj'íí kjòn ijo-la nise. ⁴⁰ Koni 'sín kjòn ra tjín i a'ta nangi, 'koaá tì'sín chon-te ya ján ngajmi nga tjín ra kj'íí kjòn. Jñà ra tjín ján ngajmi kj'íí 'sín

tsijen, kə kj'íí 'sín tsijen ra t́jín i a'ta nangi. ⁴¹Koni 'sín nga fate tsijen tsá'bí, kj'íí 'sín fate tsijen jè sá, kə kj'íí 'sín fate tsijen j́nà nitse, kə j́nà nitse, kja kj'íí kja kj'íí 'sín fate tsijen nga jngó jngó.

⁴²Ti'koaá, 'koaá t́i'sín t́jín-te a'ta 'tse ra faháya-la xita. Jè ijo ra sihi'nde, fi'ndo-ní, kə 'kia nga kjoaáya-ila, m̀ k̀ t̀i kji'ndo-ni. ⁴³Sihi'nde-ní ra m̀ t̀i mé chj́i-la; jeyaá ḱjna 'kia nga kjoaáya-ila. Ti'koaá sihi'nde ra m̀ mé nga'ño t́jín-la, kə 'kia nga kjoaáya-ila, tseé nga'ño t́jiko. ⁴⁴Jè ra sihi'nde, jè-ní jè ijo-ná koni 'sín nga kjén. Tanga jè ra kjoaáya-ila, jngoó ijo ra jè Inìma Tsje-la Nainá síkíjnakon. T́jín ijo-ná koni 'sín nga kjén, t́i'koaá t́jín ijo ra jè Inìma Tsje-la Nainá síkíjnakon. ⁴⁵Nga 'koaá 'sín tsò xajon ra t́jít'a 'én-la Nainá: “Jè xita 'xín ra 'ji ítjòn jè ra tsi'kìn Adán, jngoó xita ra ki'se-la kjobinachon.” Tanga jè xita 'xín (Adán) ra 'ji askan-nioo [ra jè Cristo] jngoó Inìma Tsje ra ma-la tsjá kjobinachon. ⁴⁶Tanga m̀ tsa jè 'ji ítjòn jè ra Inìma Tsje, jè 'ji ítjòn jè ra ta ijo koni jién, kə askaán 'ji ra ngi jè Inìma Tsje. ⁴⁷Jè xita 'xín ra 'ji ítjòn, íí a'ta nángi 'tse, kə ni'nde-ní; tanga jè xita ra 'ji ra ma-ni jò 'ka, ján ngajmi inchrabà-ni. ⁴⁸Nga'tsì xita ra i chja-ni i a'ta nangi, 'koaá 'sín kjòn ijo-la koni 'sín 'ki kjomà ijo-la xita ra ni'nde isinda-ni. Kə j́nà ra chja-ni ján ngajmi, 'koaá 'sín kjòn koma ijo-la koni 'sín 'ki ijo-la jè ra ngajmi inchrabà-ni. ⁴⁹'Koaá 'sín tsijen jè ijo-ná koni 'sín 'ki 'tse xita ra ni'nde isinda-ni, tanga ra koma askan, 'koaá 'sín kotsíjen-te koni 'sín 'ki 'tse ra inchrabà-ni ján ngajmi. ⁵⁰Kíí kə'sín xin-no jìòn 'ndsé kə tichjeé, nga nijngo ijo t́ikon koma kjoaha'sen ya ñánda t́ibatéxoma Nainá; nga nijngo ijo-ná ra fi'ndo ma ya kijchò ñánda t́jín ra m̀ fi'ndo.

⁵¹Íí jndíí koxín jngo-no kjoa ra t́jít'ma, ra ta jè Nainá t́j́jin-la. M̀ tsa ta nga'tsí-ná nga kiyé, tanga nga'tsí-ná nga kjoaatj́iya-ná nga jngo ijo xitse t́jábé-ná. ⁵²Ta inda kjón-ní nga kókama koni 'sín ma 'kia nga bichjé kə nga chí'xeé j́nà xkén, 'kia nga ski'ndá chrjoo ra fehe'ta-ni. Nga chrjoo ski'ndá kə j́nà mi'ken kjoaáya-ila kə ni-ti-kjía kiyá-ni. Kə jién kjoaatj́iya-ná. ⁵³Jè ijo-ná ra fi'ndo kə ra m̀ k̀ biya, machjeén-ní nga jngo ijo xitse ra m̀ fi'ndo kə ra m̀ biya t́jábé-la. ⁵⁴Kia nga jè ijo-ná ra fi'ndo kə ra biya, jngoó ijo xitse ra m̀ fi'ndo kə ra m̀ biya t́jábé-la, yaá kitjasòn koni 'sín nga t́ichja xajon ra t́jít'a 'én-la Nainá nga tsò: “Jè Nainá

jngo kjá kisikijne-lá ra kjobiya.” ⁵⁵“Jí ra kjobiya 'mì-li, ¿nánda tíjna-ni nga kinikijni? ¿Nánda tíjna na'yá-li jè ra sí'ken xita?” ⁵⁶Jè ma na'yá-lá kjobiya jè jé. Kò jè jé, yaá sakó-lá nga'nó a'ta 'tse kjotéxoma ra tjin. ⁵⁷Tanga tse kjonda kata'se-lá Nainá nga jé tsjá-ná nga'nó nga a'ta 'tse Jesucristo ra tíjna ítjòn-ná nikijne-lá kjoabiya.

⁵⁸Jìon ndí 'ndsé ra 'nó matsjake-no, ngi kixi tijchá ijo-no, kò kì niyá ra síkaatjìya-lá kjobítsjen-no. Kò'sín isa 'nó nda tixá-isa-lá Na'ín-ná, nga 'yaá-nájiòn nga jè xá-lá Na'ín-ná ra 'siaan jìon, mì tsa tà kjotjò-jìn.

Kò'sín tíjnè-lá nga koxkó jè kjotjò ra 'bí-lá Nainá

16 ¹Jè tòn ra maxkó a'ta 'tse naxindá-lá Cristo, 'koaá tí'sín tikoo koni 'sín kixin-lá jná xita naxindá-lá Nainá ya ján nangi Galacia. ²'Kiá nga tahingo, nga jín jin nìchjin, nga jngó jngó-no ra jìon, tináchrje'ta chiba jè chjí-no nga tikíjnatjò koni 'ki nga nikijne, mé-ni nga 'kiá nga 'an ra kijchò, mì kì tsa 'kiá koxkó jè tòn. ³'Kiá nga kijchò'tsè-no, 'aán sikásén ya ján Jerusalén jná xita ra jìon chjáajion nga ikò jè tòn ra jìon 'kiò. Kò xajoón si'káa ya nánda nga tíchja a'ta 'tse tòn ra jìon sikásén. ⁴Tsa machjeén-ní nga tí'koaá 'an kjiáan, koma-la kohijtako-na jná xita kii.

Mé ra mejèn-lá nga 'sijn jè Pablo

⁵Yaá kijchò'tsè-no 'kiá nga ijye kjoáhato ya nangi Macedonia, nga 'koaá 'sín tíjinda-na nga ya kjoáhato ítjòn. ⁶Kò tsa koma, yaá kótijna chiba nìchjin kò-no, kò tsa kíí nìchjin-ni, yaá kótijnako-no skanda 'kiá nga koto jè nìchjin-lá 'nchán, mé-ni nga kò'sín koma kisisiko-nájiòn tsa 'kiá nánda nga tíjnè-na nga kjiáan nga ma askan-ni. ⁷Majìn-na tsa tà sasa kijchò'tsè-no. Jè ra mejèn-na nga ya kótijna chiba nìchjin kò-no tsa jè Na'ín-ná ra kò'sín tsjá'nde-na. ⁸Ií kótijna naxindá Éfeso skanda jè nìchjin 'kiá nga kitjo jè 'sí Pentecostés. ⁹Nga batoó 'nó nda títjo'nde-na nga ma tí'siaan xá-lá Nainá ra 'nó nda tífi kjoa, ní'sín takó kjìn ma-ni ra kondra títsajna ra a'ta tsa'an.

¹⁰Tsa kijchò jè Timoteo, chítsijen-la nga kì tà chjàn 'cho ma-lá nga kíjnajin-no, kò nga, kì tà chjàn kjoskon 'se-lá; nga tí'koaá xá-lá Nainá tí'sín-te koni ra 'an. ¹¹'Koaá ma-ni, kì nijngo-no ra jìon ra nachrjengio, ta isaá jnchro tisisikoo nga

'nchán katanchrabá-ni nga kj'íi katsíjen-na; nga íí tíkoñá-lá ra 'an ko jñá 'ndsé ra i'ka.

¹²Jè 'ndsé Apolos, 'ñó jchán ítsikitsá'ba-lá nga katafi katsíjen-no nga kátáhihtako jñá 'ndsé, tanga kjòmajìn-lá nga kiji, tanga 'kiaá-la kiji tsa 'kia nga koma ra 'sijn.

'Én ra fehe'ta-ni

¹³Nda titsakon ko kixi tìncha a'ta 'tse kjoa ra makjiín-no; ko kata'se-no kjoa táhijín, 'ñó tìncha. ¹⁴Nga'tsi kjoa ra 'nià, ngi koó kjotsjacha-no nga tìhitjasòn.

¹⁵Jìon 'ndsé ko tichjeé, ijyeé nda tjíin-no nga jñá xitá ni'ya-la Estéfnas, jñá kjokjiín ítjòn-lá a'ta 'tse Cristo ya nangi Acaya.

Jñá xitá kii, kií xá 'sín nga basiko'ta jñá xitá naxindá-lá Nainá.

¹⁶Ko jìon 'ndsé, 'koaá 'sín tíbitsá'ba-no nga nda tìhitjasòn-la jñá xitá ra ko'sín síxá koni jñá xitá kii; 'koaá tì'sín tìhitjasòn-la nga'tsi xitá ra síxá skanda kó ra mì'on-lá nga síxá-lá Nainá.

¹⁷Matsjaá-na nga 'jii'tse-na Estéfnas ko Fortunato ko Acaico.

Jè ra mì kì kjomà-najìon ki'tsí-ná, jñá títsjá-na. ¹⁸Nga jñá isí'nchán-sòn-ni inìma-na ko tì'koaá tsajiòn. Machjeén-ní nga jchaxkón jñá xitá ra ko'sín 'sín koni jñá xitá kii.

¹⁹Jñá xitá naxindá-lá Nainá ra ya nangi Asia 'tse, síhixo'tá-no. Jè Aquila ko Priscila ko jñá xitá naxindá-lá Nainá ra ya maxkóya ya ni'ya-la, 'ñó nda síhixo'ta-no a'ta 'tse Na'ín-ná. ²⁰Nga'tsi 'ndsé síhixo'tá-no. Jìon ra xitá tsje-lá Nainá 'mì-no, ngi koó inìma-no nga nda tìkjáya-la xàngioo nga jngó jngó-no.

²¹'An ra 'mì-na Pablo, tíbindá-no xajon rakii ra ngi ndsa kjòn tíbindá-na ra 'tse kjoa nihixo'ta.

²²Katakanè-lá kjohi'in jè ra tsín-lá kjotsjacha a'ta 'tse Jesucristo jè ra tíjna ítjòn-ná. Ji ra xitá ítjòn-najin 'mì-li, jnchrabí! ²³Jè katijnako-no kjonda-lá Jesucristo ra tíjna ítjòn-ná. ²⁴Jè kjotsjacha-na ra ya nchrabá-ni a'ta 'tse Cristo Jesús, katijnako-no. Ko'sín katama.